

10305

濟南集八卷

二冊

濟南集

提要

謹案濟南集八卷宋李廌撰廌有德隅齋畫品已著錄文獻通考載廌濟南集二十卷而當時又名曰月巖集周紫芝太倉稊米集有書月巖集後一篇稱滑臺劉德秀借本於妙香寮始得見之則南渡之初已為罕覯後遂散佚不傳惟蘇門六君子文粹中載遺文一卷而已永樂大典修於明初其時原集尚存所收頗夥採掇編輯十尚得四五蓋亦僅而得存矣廌才氣洋溢其文章條暢曲折辨而

中理大畧與蘇軾相近故軾稱其筆墨瀾翻有飛沙走石之勢李之儀稱其如大川東注晝夜不息于海而止周紫芝亦云自非豪邁英傑之氣過人十倍其發為文詞何以痛快若是蓋其兀莽奔放誠所謂不羈之才馳驟于秦觀張耒之間未遽步其後塵也史又稱喜論古今治亂嘗上忠諫書忠厚論又兵鑒二萬言今所存兵法奇正將才將心諸篇蓋即所上兵鑒中之數首其議論奇偉尤多可取固與局促轅下者異焉案呂本中紫微詩話極稱薦贈汝州太守詩而今不見此首又

其祭蘇軾文所云皇天后土鑒一生忠義之心名山大川還萬古英靈之氣者當時傳誦海內而亦不見其全篇則其詩文之湮沒者固已不少其幸而未佚者更尤足稱矣

濟南集

卷一

宋 李 廌 撰

四言古詩

月巖齋詩

南山之北北山之南環岡繞嶺紫翠相參  
 犇騰踳踳萬里驂驂印行沃若靈秀所涵  
 平巒敞厲餞日西崦月生大東錯落夕嵐  
 凝輝萬壑澄若淵潭有窈人室架楹維  
 三其名實佳佳哉月巖窈人者何贊皇之  
 黜伊誰名之宗伯子瞻嗟嗟窈人天民之  
 淹昔也方將愚妄所漸喜功好名虎穴屢  
 探輪殷綏墮却戰猶酣老不及人綿力

弗堪飲冰食藥處約已甘天匪靳予事有莫氣俾予有  
知錫福則康餘齡數奇展也不占異時著書雖俟桓譚  
心勞用寡遠愧周聃今師農圃穠蓂崇芟年登歲樂糠  
稗求饜褐寬緼敬懷此不貪門子之責責我丁男我居  
區中如繭之蠶身外餘地烏用沉潛逝將掃迹於焉養  
恬披風遡景玩目嵌巉彼無獻朝居之不慙

五言古詩

觀出日

蒼崖觀出日依稀自扶桑初如浴咸池蒼蒼或涼涼漸  
若賓陽谷赫赫復煌煌海濱升霞彩貫地萬丈長攝提  
御天衢一照明萬方不願發五色不必呈九光無用現

重輪無貴珥青黃吾心願吾君盛德如朝陽照臨冒下  
土威名燭無疆不復迭而微常進熾而昌蟻行理雖切  
丸跳比亦狂病夫喜壯觀蓬心遂恢張異時環堵宮但  
見生東牆

宿峻極中院

晨游開母祠暮抵紫虛谷千峯掛夕陽猶指中寺宿山  
空無人聲暝色滿草木亂石礙饑馬荒榛走驚鹿深林  
恠禽號絕壑山鬼哭照塗藉流螢呻吟愧僮僕乙夜扣  
禪扉孤燈耿幽綠猶疑夢寢中對榻眠空室

丙子歲三月十有二日遊嵩山宿峻極中院時天  
氣清朗山月甚明因以陰壑生虛籟月林散清影

為韻詩各六句

陽崖轉窅窕層林蔽重陰披榛過輿馬綠雲得幽尋坐  
覺真境寂茲焉悟賞心

平時崢嶸想跼蹐在城郭言登諸峯勝幽情散寥廓焉  
能乘海桴終期老丘壑

日背西嶺沒月嚮東嶺生殷霞未隱彩皓露已舒明斗  
柄坐可挹政恐河漢傾

微風起前礎出山忽紆餘風吹去何之閑意滿太虛倚  
柱聊目送我生何滯愚

塵居倦喧卑區中憎隘隘游目宇宙閒山河真礪帶一  
嘯萬林端呼風作天籟

風回荔蘿香意與塵氣別杳杳雲際中皎皎松上月觸  
焉感幽處螭屐埃明發

陰燈頑雪積老崖白雲深捫蘿陟鳥道揚塵落喬林下  
方有栗場俯見歸飛禽

舍鞅陟層巘老步多獨歎笑談谷傳響松聲遞蕭散欲  
尋草堂池土室無僧贊

松風憇俗駕撫心愧營營登臨念勝土烏用千載名願  
與婦子俱終焉住神清

穿雲上虛無彷彿凌倒景微茫鴻鵠背指點衆山頂出  
日上扶桑徘徊萬林影

西郊

黃花作秋色  
槁英作秋聲  
殘春有秋意  
奈此惻惻情  
喬木點新翠  
古壠集飄英  
午風薰徑草  
麥浪搖新晴  
脂車逐勝士  
訪友來西垌  
苦汗泣瘦馬  
流塵汙華纓  
飄然發孤笑  
屢醉輒屢醒  
聊歌干旄篇  
愧我未登瀛

觀文恪王公樂道院巽亭在城上下臨湫水

氤氳蟠巽隅  
崢嶸干斗魁  
蕪城佳氣緬  
茂林朱檻開  
竹月靜蔭扃  
松風綠搖盃  
開軒清流度  
隱几遙山來  
格公昔優游  
弭節此裴回  
言念平生客  
翻然九泉哀  
張老頌趙寢  
雍門悲孟臺  
歌榭奄凝塵  
燕閣鬱生苔  
侈靡一轉盼  
金碧復成埃  
獨無不忘者  
安用爾為哉  
恪公古遺直  
勁氣騰九垓  
豈惟甘棠愛  
公嘗守許將與故國偕  
傳家有元

凱上客盡鄒牧  
聊興勝士想  
愧無能賦才

釣渚詩

釣渚平過水  
筆溪清見底  
寒煙曉冥冥  
白石明齒齒  
目送歸鴻飛  
游心志鱸鮓  
手應心不疑  
物我相諾唯  
黃雀漫多驚  
白鷗來自喜  
之子未投竿  
我來頻洗耳

盧巖

徵君邈已遠  
舊隱鎖雲扃  
欲知敬遺德  
巖以姓為名  
永言配此山  
千載為德星  
雖無猿鶴在  
空餘泉石青  
想昔居此地  
笑傲輕冠纓  
入居伯夷室  
出効子真耕  
種德如古人  
養育達周京  
惟能抱永正  
是豈其用卿

黃楊林詩

黃楊性堅貞枝葉亦剛愿三十六旬久增生但方寸今  
何成修林左右映煙蔓良材豈一二所期先愈鈍

臨溪檜

青青弱草陰猶能蔭寒魚况乃葱蒨色百尺映扶疎月  
烟含清曠水氣相吹噓忽思大明宮垂楊拂丹渠豈無  
蒼翠色飄飄映茅廬日暮生幽寒寂寞意何如

天封觀將軍柏

衛懿恃昌富乘軒鶴有祿貴鶴賤用民身殘國顛覆楚  
子惜名馬終焉葬人腹爵封東山松侯比渭川竹時輕  
官秩柰辟妄作威福無益害有益褒賞逮禽畜所美非  
美然恩澤及草木或譏將軍柏無乃狃此俗曷膺千鍾

養曷被三品服不為朝廷力竊號委空谷余知將軍心  
非悅世人目十年抱貞操勁節無屈曲不為歲寒凋守  
此萬仞綠天武累此名寘不知寵辱雖不助相敬豈意  
慕軫轂吾儕之小人悟主惟欲速盜功仍苟容豈恥無  
道穀潭潭居紫府沉沉據華屋貪恩謀子孫占俸及僮  
僕膏盲病天下天下思食肉朝為四輔重莫作三危逐  
笙簫金谷宴嬰柳北邙哭尚方屬鏤賜朝服東市戮君  
看古功臣牖下死為祝將軍如有心應笑世愈蹙拔萃  
真不羣虛名豈其欲胡不觀其旁滿山皆撲椒

鳳凰臺

舜韶奏九成鳳凰故來儀漢徹今秦政何乃悞至斯爾



非雞與鷲出處當慎時

送霍子侔還都

真人造區夏民瘼僕以蘇戎衣振不格力舉覆地孟桓  
桓神武威自信人未孚當年羣嘯聚劍立猶稱孤天旋  
地轉機曠谷吹塌等瞳瞳東方日揚光扶桑隅文明燭  
無疆煌煌中天衢曾孫太平君稽古唐虞連求賢用吉  
士隱淪來真儒股肱協帝躬腹心懷良圖庶事正絜矩  
嘉言規典謨欲將醍醐酪沾濯瘍垢膚又慮天下事學  
古太殊塗衆說折聖經丹青久將渝世稱淵華者春秋  
華實敷攷之篤誠謹熒熠皆穿窬况復口耳學槲植冥  
索途終身不知道死矣如螻蛄無心時雨化蠲狄狂狷

于法言立定論章章如璠瑜專經務篤實使士知所趨  
欲皆抱道義如孔子之徒士各重良貴豈若乘風鳧亦  
有倔疆革索足行深涂如經風過耳不美七尺驅斯人  
雖云存衆昧不容誅振振文風聲得與帝載俱先生住  
毗陵才望振國都時方尚雕蟲如紫色奪朱獨專性命  
學已與衆欲殊窮年志專一立節如仲舒幾年困禮闈  
輿議久已需錦衾爛絺帷羈絆縻於菟滿衣京洛塵馬  
病僕亦痛前年彤庭下射策關彫孤如何扛鼎力不勝  
舉匹雛官卑府參軍知命安嗚呼青雲有伯樂俯識千  
里駒鋒斷吹毛羽氣節凌轆轤究之性天遺溟海不可  
料遂言黼座前此材誠楠棟方今構大厦不可同朽株

嘉言沃宸衷頓首帝曰俞汝其姑試之育士師東吳東  
州士氣懦勁草惟蓬萋循循教不倦啟發親持扶義方  
達遠邇來學皆奔驅瑞鳳止美竹飛翔鳴高梧賢哉師  
道尊丘軻居魯邦巍巍數仞牆深邃不可踰宗廟百官  
富不見空踈跽三年就傳訓弦誦惟歌歛或謂我自然  
孰知如蒲盧濟濟榛楛茂皇州忽云徂士民惜其去夾  
轂爭挽輻老叟遮道留寶篚攜漿壺謂言感恩惠成我  
妻與孥去矣不忍還望塵猶歡呼嘗聞有美玉不琢隣  
砥硤美質逢利器欲切惟錕鍔子時才力薄治邑民歡  
娛季路在大國止可治轉輪古有孟公綽知宏才有餘  
優于趙魏老不可為大夫皇皇魯聖人道困將乘桴才

單敢兼人道蹇罹量學先生天與才貫溟五色湖昔否  
今已亨天扉有攜愉行行近清秘召見延英廬一言悟  
明主欽哉帝云吁朕方在穎邸鄉譽時已憮何其數年  
間下國猶劬朕意在教育如芑生新畝往為東都邦  
朝野多美譽往矣勤勿怠潔白相連茹或然何其嘉宿  
憤得以攄上苟膺寵光不日昇朝裾待詔金鑾殿著書  
文石渠不見穎陰叟拖紳晉金魚河湟少年將五載登  
台樞

鹿門寺

蓬萊鹿門道莽莽漢津渡川塗兩緬邈今古同此路德  
公厭州里翁媪是中去風流可引想千載豹隱霧浩然

遠城歸羸馬琢妙句宿草被荒邱寒榛軼驚兔昔我懷  
登臨歲晏屬凝沍茲遊愜於願春仲忽云暮杖策升翠  
巒喟嘆憐老步冠雲得危亭臨世濯凡趣蒿薺俯青林  
繡繪辨紅樹他山照寸碧迂江泣晞露我生老憂患習  
次貯百慮寓目宇宙間猛省忘外慕前瞻萬松嶺翠壁  
屹相顧輕颺觸纖柯虛籟森已度甃道繞危巔爽氣襲  
籃輦傳聞古道場臺殿若靈布日者一昔灾楹棟皆若  
炬壞垣積煨燼况乃金碧處山僧勤樸斲堂構畧已具  
童奴一萬指役作共指呼常有鬼運牖變現助持護蹇  
予藏史後道骨天所付一為功名想悞落塵土污華顛  
髮先縞薰面顏色故惟有炯炯心從昔常自悟會當借

巖谷投老寄冠屨吹雲飯青精煮石羹白芋神遊八極  
表諷誦大人賦鷗鵬或圖南為予閩風御

四逸臺

異時常獨飲對月成三人已喜三士遊况遇金城辛洧  
淵俯龍室廢臺干白雲委徑已就荒九仞將遂湮飄然  
如四鶴躡展披荆榛北岡翻波濤南岫列嶙峋登臺與  
佳名大筆書蒼珉占此泉石清坐使草木春諸公廊廟  
材我期茲隱淪

關侯廟

三方各虎踞猛將皆成羣屹然萬人敵惟髯稱絕倫仗  
節氣蓋世橫稍勇冠軍艱難戎馬間感慨竹帛勛鳳闕

控蠻楚廟食漢江清神遊舊戰地庭樹起黃雲

白馬寺詩

淡漫漢江皋迤邐楚山岫衡門掩半麓飛甍聳層構高  
林敞華椽雙泉逗瑤甃龜魚水中坻牛馬飲殘溜我卜  
關外居此計春可就參差菱荇香猗儺參朮秀行吟池  
上篇來倒壺中酎

墨池

臨池苦學書池水為變色終朝坐忘疲搨卷每自得滋  
靈蚌孕貴飮餌魚腹溢回堂映茂草玄源漱白石祇恐  
驪龍飛蜿蜒上丹極

伍子胥廟

烈士可廟食么麼可悲夫誓心報荆郢忍耻適江吳功  
成期滿下旋聞賜屬鏤楚邦乃怨耦宿憤嚮已攄濤江  
厭波神魂魄游故都存亡兩陳迹無用愧包胥

題廟

菜巖傳胥靡耕野萃老農儵來坐廟堂談笑樹奇功卯  
金運徂謝孔明隱隆中誰言一丘壑卧此天矯龍古來  
王佐才中間千載空之人輔立德真有宰相風惜哉小  
用之功烈不復東嚮非三顧重白首田舍翁

華嚴庵

人生異區中猶如繭中蠶欲窮無然心足力有不堪終  
南有五虎銜牙坐耽耽乃有忘軀人臨穴已擬探干將

古寶劍吹毛可揮錕亦有躁戾者執刃求其鐔所得計  
所傷胆清心憂悛况夫爰見魔悅如翁秦甘大士獨了  
然白月沉珠潭獨造無僅漢妙理去二三至哉天下樂  
端默坐草庵

岑使君牧襄陽受代還朝某同趙德麟謝公定潘  
仲寶皆餞於八疊驛酒中以西王母所謂山川悠  
遠白雲自出相期不老尚能復來各人分四字為  
韻以送之某分得相期不老

使臣撫南夏萬夫久以望道粹韻宇勝德滿聲馨香炳  
然龍虎文琢此金玉相笑談府中居無為民自康  
我生世寡與所幸賢者知徽中山川意賞音有鍾期荆

楚非我里從公甘棲遲今茲復舍去何以紓吾悲  
閭閻無居人頌城餞賢守擁車不得前遮拜奉卮酒民  
言荷恩勤拊育踰父母公不鄙我邦端能再來不  
公如照乘珠居期作賢寶公如三秀芝後天錫難老聿  
歸供奉班漆簡探幽討懸應念儋父滄洲濯蘋藻

劉表嶺

入自東郭門言拜景升墓墓樹半枯槎冥冥立晨霧鼎  
國昔未分蕭牆梗天步呼蒼復何用龍卧獨不顧紆餘  
檀溪水黠慘蔡州路登樓欲遣憂君看仲宣賦

故諫議大夫鮮于公欲作新堂以傳世譜名曰卓

絕唐人鮮于世譜有卓絕之語故云內相先生題其名曰蜀鮮于

氏卓絕之堂某以此八字為韻作八詩蓋鮮于公  
頃嘗俾某賦之而三子以求其詩故原其古而美  
其今以頌美之

商朝有仁人為奴耻榮祿九疇傳帝秘八教清澁俗苗  
裔散諸華慶澤鍾左蜀崢嶸多望人冠冕稱盛族  
左蜀富山水錦屏秀而鮮卿雲常氤氳佳氣所盤旋蘊  
此天地靈並生文武賢稱忠著甲令節制控兩川  
天地西設險劍外分野殊君家萬里侯支郡許專誅威  
名讐天下玉帛走易于鞞鞞常棣華煌煌駟馬車  
功高翊戴重錫土仍命氏蟬冤舊傳家龍袞式增賁誰  
云五世澤久襲萬鍾賁非惟賴先慶奕葉藝忠義

隱居嗣徽猷超世得古學行藏合用舍聞見守約卓清  
風激頽波精義興後覺天子不得臣鴻飛復何邈  
先生王佐材蚤歲常數奇平生經綸志白首初逢時經  
營此堂久乞身竚歸期堂成不及登魂氣今何之  
諸孤皆妙稟况乃承義方世濟商人美各是萬夫望拳  
拳奉先志誅節建崇堂豈徒輪奐美卓絕當未央  
吾觀孔父鼎知有名世哲英英大諫公克世嗣前烈翺  
翔金鑿坡白首貫忠節後昆有斯人譜系愈卓絕  
趙琦赴成都府廣都縣尉以送君南浦傷如之何  
為韻送之作八首

吾生常竊慕送客情更重嗟哉平生交今復萬里送愁

端寓心目往感接魂夢窮途獨栖遲直道竟何用

山河接巴徼關塞斷秦雲誰為萬里侯節制錦江清疆

項母狗指西鈎難致君勿因朝廷遠俯首俗吏羣

昔余旅長洲寄傲碧江潭十年客風埃留滯困周南再

再老將至兀兀漫窮探故人各變化漂零空自慚

之子才如冰不應常負弩勿為為貧謀一意在阿堵廣

都綺縠地當念珠還浦惟廉可立身勿使嗟供虜蜀人以東

人為虜  
貨而歸

朔風走塵沙草樹正玄黃煙昏路漫漫日冷雲蒼蒼杜

公作詩處武侯近戰場陳迹勿驚心俯仰已堪傷

蜀都蘊奇氣古今生英儒歌童選何武狗監獻相如煌

煌直金馬藹藹侍玉除歸入芸香閣無廢五車書

傾城愛勁竹古士惟徽之而我獨愛君不見即相思今

矧萬里游動為三歲期索居念金蘭惘然傷別離

蜀山如鳥道劍閣鬱嵯峨嗟君正朱顏奈此艱險何秋

雨峨眉道春風濯錦波青山一羸馬古今應更多

秋日雜興

悠悠東郭道莽莽四海志晨光晞高林泣露泣征轡巨

防揚淶漪哀泉赴橫衛我生窘羈束感歎撫消髀

青青陌上草秋徂故應省疾風試飄葉寒露猶湛潁冰

霜來無時爾命詎堅永滋蕃奈爾何咄咄臨此景

昔喜馬少游我馬仍款段古云未路難百里九十半與

爾皆調饑欲速輒愈緩長鳴徒勞爾終愧箭雲汗

黍稷競登場荏菽復滿疇我羹雖不糝逢年亦解憂大

平豈無象樂歲觀有秋敢期飽糠覈役車何當休

拒黍亘廣隰整整萬戈矛旌旄亂風葉森森疑戰秋如

聞高奴塞將軍用世侯勝筭應在目願解西顧憂德

延

芡珠乃邊實雞首真溪毛芥羽復丹情凌波競將號蒼

啄勝元虵百琲轉含桃驪頰有照乘海夫得應勞

搖搖平岡雪芬薌薔花白繁英未脫鄂銳實已潛黑速

哉不踰時幾何天地力寒耕暑方耘古人勤宿麥

橫烟下平林閑雲依哀嶺寓想高鴻背游目凌倒景吁

嗟老于行末路未逞騁晚歲竟如何三歎心耿耿

汝華巖

秀法華居之夜  
夜開山鬼打更

道人居此巖誦經歲云久鬼神夜護持空巖擊刁斗吁

嗟已成塵藤蘿穿石牖

與鄒浩志完會於王希聖家因話毗陵事是夕輒

夢還松陵因述夢呈志完

客夢還松陵寒江渺煙雨異時醉吟地依然記洲渚三

高平生歡彷彿遞賓主十年扁舟興一夕暫容與此樂

曾未央覆瓿俄驚鼠隙月鑑我帷破窗風自語展轉誰

晤言僮隸聊爾汝吾生獨何事寤寐仍羈旅

送杭州使君蘇內相先生某用先生舊詩方丈仙



人出渺茫高情猶愛水雲鄉為韻作古詩十四首  
至人本無我與世初無方疆從金鑿游聊用示行藏忠  
清秉全德日用可爭光振衣千載上臨世濯滄浪  
至人孰可測跨世富英量千齡邁治運萬古真遐想三  
台接布武萬乘拱函丈辭榮明光殿乞身青天上  
世人期公淺云是真謫仙願公老台鼎白首冠貂蟬為  
之乃固有弗為愈知賢清風不可挹高高薄雲天  
紛紛競干祿汨汨第謀身先生獨任重憂道仍憂民精  
誠貫白石孤忠橫北辰求之千載上古亦鮮若人  
平生史鱗直往歲展禽黜青衫竄長沙華鬢謁宣室重  
光照八極命世真賢出奈何江湖去獨為蒼生卹

道德當瀛海百谷輸浩渺雲夢吞什伯坐暎黃陂小斯  
文再炳蔚精義凌縹緲典謨追灝靈協氣充四表  
周公非汲汲仲尼豈皇皇吾道無若人孰能相維綱古  
今異倫軌英風自相望下民今喁喁造物太茫茫  
造物雖茫茫至人自囂囂雖稽具瞻意欲全千仞高富  
貴一蔽屣功名兩鴻毛獨知退為樂可憐夸者勞  
公去吾道辱公來吾道榮生民繫休戚國勢隨重輕先  
生如九鼎坐折姦宄萌天如欲平治用舍若為情  
先生如著龜萬事可告猶勲業輕黃屋得賢方解憂念  
昔彙征日民瘼庶有瘳莫賦歸去來衮衣或能留  
吳越控島夷東南一都會淫風舊倡靡懦俗無慷慨除

弊在躬行報政可立待類非俗吏能千齡樹遺愛  
邇臣均勞逸方面乃毗倚細人怙權寵補外習為耻餘  
杭股肱郡湖山真信美意雅如望之肯効倪若水  
小人雖嗜學歲月空屢勤同門盡駕鸞登瀛校書芸嗟  
余老西河索居久離羣從龍從上下愧彼油油雲  
四海李元禮龍門多俊良英英郭有道一揖遂生光畫  
鷗凌雲波仙舟水雲鄉此心徒皦皦千里共蒼蒼

雨中宿超化寺

暴雨如建瓴龍淵俄怒流逸哉我三士冒雨探奇幽古  
寺浮積壤危若萍與漚抱憂窮樂事斗酒聊重留

遊超化寺

常笑博望侯老死窮河源河源幾萬里天派垂崑崙支  
流播九逆砥柱疏三門行穿九里折怒溢千里奔樂彼  
涓水源近且具茨根寒泉發清池藻鑑撓不渾引為玩  
瑤玻碧波媚蘋蘩逶迤入王城順下德可溫全此上善  
性利用豈無恩下有萬艘濟旁列千夫屯持此安且靜  
用鑑暴與昏頃年時聞龍淵室今應存秉簡俗何陋濟  
輿惠亦煩誰知千載後佛宮枕溪清喬木上參天綠竹  
盈短垣曾此埒金谷神龍依祗園物理自古今興廢復  
何言聊思鄭國僑殊勝漢張騫

木文真人章聖朝合州進到其事甚怪至京其木  
中人呼萬歲者三詔賜崇福宮

犀視月通角蟬想九日入果羸祝螟蠕天風化陰鷓物  
變知品殊尚可易形質真人友造化故與物為一持此  
誠與神可貫金與石何為輒入木厭世未肯出衣冠儼  
如生隱若陸顧筆非同木居士聾俗競襍技又非羅公  
遠戲隱逞幻術疑是青羊老合江聊示迹薄游附驛車  
靈宮居二室

西邱

西邱對秋風蕭颯如原隰木落景扶疎碧環天壁立餘  
霰拂暮散夕陽寒更急獨有松上鶴不為鸚鵡粒

廡葺介堂元聿作詩某次韻

吾生一漂梗觸烏泊東周十年歎流滯吞默垂遠猷胸

中猶汪陂萬頃蟠一甌輿羽欺鎡金寸木傲岑樓圖南  
平生志腐鼠詎能留寸心徒自傲雙鬢颯先秋物理有  
否泰奚為久休囚尚愛東方朔處汙能若浮悲鳴非不  
切歲月老驂騑莫笑掃一室吾心若虛舟會當掃天下  
歸老卧滄洲

百葉梅

寒香本已清真色初既好誰私化工力增綴愈妍巧繁  
葩貯春意幽姿照青昊獨無和羹實終應愧其表

夫人城

庸將昧奇正乘郭罕書勛我登夫人城想見畚鍤勤攻  
瑕既遇堅坐制烏合羣異時古烈婦鮮以智勇聞褒稱

勵愚懦敢諷賢令君作傳續烈女遠紹子政文壁間畫  
葆羽俾如娘子軍

次和答張閻寄靈壽杖

我生職貧病壯齡俄早衰朱顏不少貸白髮太先期故  
人獨閔余遠寄靈壽杖老景知有賴醒醉為扶持

憶吾廬

繆挾經世策忝哀甘湮淪吾廬有佳趣一廛良可親茂  
林修竹地青山白雲人塵埃付捷徑風波委要津吾心  
如皦日外物任浮雲久厭牛馬走欲令鷗鷺訓歲月既  
荏苒功名定因循執鞭吾弗能得乘豈所欣畎畝樂可  
必糟糠奚用勤泥龜喜曳尾生芻耻屢陳東濕雖有術

末路復誰因願為海底泥肯羨山上塵

谷隱飲中以采菱渡頭風起策杖材西日斜為韻  
探得采頭二字

東西南北人志向各有在一言契所適糾纏胡可解英  
英坐上客聲聞著寰海婆婆諸侯邦未去亮天絳顧余  
寸有長葑菲誤見采山空佛宮冷秉燭集飛蓋笑歌觸  
松風出谷作天籟後夜風雨時惟應鬼神會

山川納商氣凜凜天地秋草木將玄黃詎肯烏我頭  
歲謬懷壁轆轤轍欲周富貴來無期舍鞅息林丘復棄  
農園業為茲山水游來尋彌天釋軟語忘百憂夜傾雙  
玉壺禪詠互相酬試澆碗磊曾洗我千斛愁

會居易齋分韻

君子何樂奪清夜以文會篇章各紛拏錦組貫珠貝高  
譚生清風石齒漱湍瀨安得樓蘭內充餘炙膾庖

啟母廟

帝武啟宗周元烏濬哲商塗山配神禹獨不嗣娥姜異  
時天與賢嗣子繫匪良欲肇天與子是用開厥祥鈞臺  
享羣后有扈誅叛方誰令謳與訟帝畀有夏昌推此方  
朱均巍巍真令王伯陽指株李阿衡降空桑龍踞生漢  
祖襲聚誕褒娼石裂何足問世語多荒唐若比望夫山  
雖怪猶有光

筆溪

張生古狂夫草聖稱豪邁縱橫意有得野馬御風快醉  
醞忽驚神自以不可再乃知高世能至理適有在况夫  
窮年華朝夕精揀汰期茲筆溪水色變崑崙派

施栢花

佳花香藹藹老栢意蕭蕭如何蒼翠質許附繁柔條仙  
人踏錦障襯步武夷橋願託歲寒心凌虛上煙霄

偃栢

名園氣虛濶怪栢獨凝偃高枝翳浮雲翻然志飄遠赤  
松來何遲黃鶴去未返蘇武遊漠北矜傲何蹇蹇朔風吹  
寒枝日暮羊在坂疑此高聖材獨得造化本蕭蕭古池  
上不與凡木混

霹靂琴

老桐初無異憔悴革散木良材固自信終歲委空谷孤  
根聽霜霰厥命寄樵牧雖云具官徵誰意望琴筑天公  
憐冤憤霹靂驅怪伏蛟龍出蒼幹電火燃裂腹造物一  
慙弔為惠在反覆神池變廢物瞻賞改舊目裂為君子  
琴日奏太古曲因知物興廢尚爾轉禍福志士抱孤操  
來者悅未卜壯年昧籌算奚用定榮辱

濟南集

卷二

宋李廌撰

五言古詩

同德麟諸公觀秋風閣自賦詩臺乘月汎江

虛閣凌縹緲危臺俯淡漫憑檻眺落景倚柱送歸翰空  
濛暝色合懍恍天宇寬皎皎明月上炯炯青林端寂歷  
四郊靜陰森清夜闌秉燭下草岸迴船遵柳灘繁星粲  
湛彩白烟隱微瀾夷猶放濡溜閣澹數烟巒絺衣涼風  
發角中滋露溥心適醒亦狂樂極清更歡叩舷過龍室  
抵掌驚水官仍思燕犀炬下欲窺蛟盤風雲襲毛髮冰

雪凜肺肝慨歎念前哲興懷成壯觀  
塞予棄訓敢放意  
遠遊般合鞅昔徂歲維舟今戒寒  
佩服良友義論言畏  
塗難茲遊興不淺冒險夜未安  
風波彼何懼忠言邪能  
奸

又九月十四日登秋風閣以餘霞散成綺澄江靜

如練為韻分得餘靜二字

繆蹈江海迹吾生靡懷居役車  
窮陰雨蒸腐敗衣  
初晨昏雷聲中我懷何時舒  
秋陽出頑雲杲杲照我裾  
言登秋風閣乘興安可徐  
猗紆下銅鞮縹緲凌紫虛  
錦葉眩林表金包垂霜餘  
棲苴寄榛莽潦痕在菰蒲  
我遊獲所適况乃弗為魚  
放意宇宙間所至皆吾廬

山客水不覲丞雲日如甌陵  
陸混泥沙黯慘度朝暝  
晨霞送晴色喜見天面瑩  
江光劍歸霞雲收四山靜  
高閣眺空無復見前日勝  
回思困塗潦愴恍如昔病  
登臨勿太息秋風漸焱勁

搗帛石

嫠女織玄絹欲作六銖衣  
空山搗寒月傳聲徹雲間  
可笑綺縠女不識砧與機

同德麟仲寶過謝公定酌酒賞菊以悲哉秋之為  
氣蕭瑟八字探韻各賦二詩仍復相次八韻某分  
得哉蕭二字

楚女唱桃葉楚巫歌竹枝  
壯士撫長鈇語闌亦興悲  
君

看拱把松中有千歲姿華不及夕柯葉漫成籬  
歲隳晚秋菊芬菲忽齊開綠塔上古壘梁若黃金臺搔  
首念霜髮擷英泛羽盃頽齡恐能制壽侯安在哉  
白髮諳冷暖蒼皮貯陽秋中年已如此一飽更何求把  
菊悼飛葉微行遵遠流此非柴桑里乃有淵明儔  
痛飲可一日寧辭手中卮挹斗自斟酌澆胸定為宜心  
如虎在圈事若羊觸籬執鞭吾弗能放意從所之  
青松多陳根女桑漫柔枝虛心任寒暑寧與鐵炭期青  
酒有妙致青山多令姿醉遊卧丘壑於予復何為  
松菊徑勿荒政欲善鋤治參商管蒯中高韻自超異區  
別雖少勤實此吾臭味勿言大鈞中與彼同一氣

霜風隕高木零落臨艾蕭幽芳枝孤秀華心慰無慰堂  
中老元亮日賦歸去謠杖屨樂三徑為爾甘折腰  
風騷本無作強為憂患出菊荒思卧陶江潭歎沈屈吾  
觀思王詩復若清廟瑟斯文章未墜且進盃中物  
神松嶺即岳神為珪禪師一夕自北嶺移者  
初聞百梁村拔自天池井今知萬松岡一名趨北嶺顧  
茲挾山威何心罔知警

二士避雨巖

遇險思共濟胡粵無異心而我與夫子義烈真斷金陰  
崖避飛雨羣龍方怒吟巖中歌式激相和相知音  
送元聖庾縣丞之官泉南



漫郎老倚玕紫芝于為于二元皆國器位卑德有餘嗟  
公有祖德官况復不如平生志引大英爽凌太虛胸中  
有武庫羅列千卷書攘臂班馬間豈但突黃初謂宜在  
妙齡持橐承明廬何為沈下僚蹭蹬青雲途三調南曹  
選雪霜稍侵鬚又佩墨綬去不得黃紙除憐公批勅手  
乃判稅與租閱世悟休戚勝負如臬盧達人自通脫於  
何較錙銖平治不平氣俛仰自走趨剛忍素所遇時乃  
烈丈夫南安極南粵控帶荆與吳南涯即滄海北渡竟  
重湖回首望嵩嶺邈然天一隅南州例卑濕海錯富蟲  
魚作客萬里外善保千金軀加餐慎興寢三年賦歸歟  
故園有老伴林下要為娛

德麟約遊西山某自鄴來會行李阻修成此詩

初無聲利想獨有山水癖慨然歲月逝名山喜投跡書  
來拜嘉招吹火自蠟屐戒期西山邑奔命通書尺君詩  
如齊楚凜凜兩大國吾詩比邾滕惴惴甘服役千里奉  
詩盟敢愛股肱力方舟絕清漢舍棹上層壁梅堦排青  
雲四覽象山脊僮肩困負笈馬喙不停息趼足上崔嵬  
欲進輟已植喘喉如鼓橐開闔振胸臆仰愧升木稼俯  
羨歸飛翼天曛未敢止行行望仙鳥

見山岡詩

高岡勝虛閣晚景澄廓廓遙漢浸廣野危峰柱碧落雲  
過半山陰蟬聲夕陽薄勤勤學飛仙海上尋黃鶴

三醉石詩

伊昔三逸人醉卧捫白雲其間歐醉翁翊戴建殊勛山靈豈美爾應復勒移文

中隱庵和趙孺韻

退之以文鳴師友得侯喜聲名力與俱雖尊未勇耳黃池距青山孰辨都與鄙庵成誰振之句出鬧如市千仞寧我高充實信吾美坐令庵內人前車云可軌禮樂有先後後進則君子執方而昧圓俱野那復史伐柯固執柯時克求諸邇蒸之既匪薪采焉又非芑近交韓與侯步驟亦常耻一醫消息盡布毛自何起要須六月息不為己敢問二詩人如何得意旨

答周行已相贈行已端慎大學諸生忌之

佳人寓雲端餌霞服靈烟舉手謝時人言爾非我綠誰令山中瓢酌此闌闌泉捨爾芝蘭薌一染漸餘羶鉉黃強為容孰竟謂子妍眷焉反初素此道自古然

習家池詩

言登峴椒亭南望高陽池習君漢徹侯種魚千石陂川光涵翠草倒影媚清漪伊昔典午世山公已遊嬉子孫安在哉獨樂寧可期蕭蕭宰上木長風蕩餘悲

習鑿齒宅

習侯有世德冠冕襲鷄鶩裔孫富六藝鑿齒四海知蘇嶺涉家山高陽浮故池著書山水間秀發胸中奇間從

彌天釋善戲間庚辭尚友雖異代斯人可夙期

龐德公宅詩

荆山雲蒼蒼漢水波瀾瀾山川意高澹宜有隱君子德  
公卧鹿門老不踐州里潔身遠憂患豈復存温喜貌然  
姑射人胡為市門倚諸郎有鳳雛輒與卧龍起

過具茨諸山始達嵩少

初踰千峰時千峰各呈秀抵茲高高前始覺眾山陋恃  
此一柱力天地敢分割四維既張弛穹壤託高厚卿雲  
幕上國秀色連楚藪眾峰無聳峭配此真培塿固將倍  
十百何止吞八九余身一草木乃欲擅去取出類復何  
言聊貽澗濱史

登嵩頂

丈夫有奇氣坐井直鬱鬱竭來古嵩州攜手登太室中  
峰到絕頂北嶺太峭壁山河在股掌帶礪何足述星分  
九州野塊烈七雄場放懷宇宙間想見天地闢下觀雲  
雷變愍爾龍鬼役下方萬仞底草木靄蒙密愈知天下  
小助我浩氣直平生四方志登臨聊感激嗟嗟封禪媼  
遊豫朝百辟誣辭與慙德可笑乎四嶧廟社尚不閱財  
用遑肯恤萬兵樹豐碑數丈壓嵩峯豈知市朝變輦路  
蔽荆棘同登八仙壇再題三醉石君無笑余怯登臨常  
股慄為竇千金軀夷路猶恐失存我厚蒼生豈效伯昏  
逸歸卧聽天鷄扶桑觀日出

求志書院詩四首陳師道履常之所居也

癯橋巖下士蹟隱心捷徑汗顏塵中夫諛笑幸遊騁賢  
哉陳夫子兩不傷厥性潔身風波塗獨若萬鈞錠  
辰極不改北滄溟日輸東聖道亦如是昧者自異同哇  
鄭迷世習舍魚當取熊著龜期吾子此語聞先翁  
君氣久已浩君志復何求同聲久絕和一見忘百憂藜  
藿鄙膏梁締綌傲孤裘德輝下可覽安用翔九州  
漆開辭未信顏回恃有田為貧任何媿得已非自賢破  
褐坐窮閭聲華飛日邊苦節勿匏瓜仲尼任蒼天

靜齋詩題盛君明之室也

人生乃動物萬事皆動端陰陽造化汝賦汝以五官五

官各治職愈治當愈殘非苦動所擾烏知靜為安非惡  
動所戕為貴靜為完百年夜分半夢想仍妄瞞動多靜  
常少竟為動所干回光一字照萬事無悲歡居士何早  
達動境能反觀寧為玉在璞不為珠在槃盧事生朝白  
青瓊凝暮寒聊持動時想攝入靜中看

寶幹山茶

山茶乃凡木寶幹始為奇婉雅瑞荷花扶踈連理枝傾  
心相爾汝和氣生怡怡清陰亦可愛惡木正離披

上姑丈閻印通牧少卿

天下一大器安危繫平傾哲王慎民監措術如和羹辛  
甘或偏長非可制割烹五味既可口君子嘗曰平方今

太平君戒欵如持盈乞言用龜鑑履德均權衡庶民雖  
蠢愚一或非所營視之如己內涂汚千仞坑是用選賢  
德告戒敷至誠曰雖一人良萬邦咸以貞尚賴爾庶牧  
裨朕來聰明分符授虎節專政千里城朱車輪兩轡畫  
戟門十旌禮文既光華遠耀如杖英良圖沃朕心蠲瘼  
求民情如意運手足乃與朕力并朕所戒假樂難慎惟  
守成願昭先人功莫枕臨周章羣方政咸乂惟海隅蒼  
生魚鹽機巧利涼德多矜爭版圖庶彙徵雉壘侵荒荆  
矧秉荐饑後魴鱮尾多頽古既無罪歲此獨何所令明  
明普天下孰非聖人氓當求善仁政如解中山醒時公  
罷仙班入觀中天閔帝優老成人錫祉昇名卿吏能素

嚴翼公望方崢嶸物賴山愈靜川納海益竝齊安漢中  
治政迹如韶莖剛明濟清淨錦組輝瓊瑩果毅將慎智  
佩玦鏘璵珩英英衆人師落落天地晶是用簡上心僉  
議如預盟公辭臣老矣已與世累輕東吳富山水烟霞  
氛紫清樂郊適所願逍遙掛塵纓賞延及孫子榮慶并  
弟兄智恬欲相養為壽期老彭帝云東州民思濟求令  
名室如相忘魚煦沫泮轍泓痒如旱麓木枯槁需春萌  
朕意慎許可當賴王國楨如翩皆飛鳥遊集性鶴鵬無  
辭逆朕意欽哉卿惟行公承帝眷異竭節期有亨郡民  
幸其來爭以先見榮實匪攜漿壺馬首拜且迎謂言前  
掾曹執禮無私評遠茲三紀歷位重德愈宏下車始授

政季秋未徂正圖屢空虛盜止無黥刑康莊夜達旦  
戶啟民不驚柔遠戒慢令荒政先緩征榛楛已濟濟  
蔚將菁菁熙熙春臺樂苾苾太室牲嘗聞至仁化政立  
可去兵又聞公明心罰罪能驅鯨古云州縣勞此語非  
準程韓侯公固高羞比於絳嬰光初必凶終進銳多反  
瞠如徹禮飲酌疆酒莫兕觥雖云快壯心泰至多配醫  
孰知安行健履坦非掀橫圭璋賤珉玼山川貴剛駢良  
弓豈苟飾利用關以彌斯為古循吏業廣惟勵精孤生  
何所懼自幼憂患縈遭家屢不造省始離呱嗶邇復遠  
所恃羈迹如漂萍操心但書危固戶賴巧費曲蒙惠私  
重哀愚斯獨婢宇撫得不違俾就三龍鬻曰余欲玉汝

山房校書

誰何怯金贏愚非苟恩者銳志思迅鏗為修不敢殆希  
彼農夫耕勲勲慮冠至豫蓄終歲盛戰戰與心兢中林  
亦丁丁淵崖視鳥道履冰越深瀛剛克素自許竊亦輕  
申張永言念春勲願以堅白鳴作詩謂云何姑以紀頌  
聲

曉發鄧城和德麟韻

遙岑掣殘電炫轉雲篩碎長庚送曉色頽洞初見地饑  
馬戀樞鳴呵牛繫林睡橫塘寸魚跳魚跳石雙翠敢嗟  
衣化塵且喜風泛袂忝懷功名心經濟豈無意老軀既  
骯髒柔態漸斌媚棹舟江南去白酒謀日醉絲尊毛雪  
鱸欲飽三尺喙半生客荊州兩渡北津水尚友有若人

獲我心所契行李念淹留感此秋蟬鳴掃除向來想漁  
釣真得計塞翁已無心得失無欣喟

鄧城道中懷舊時德麟相拉至江北三縣

昔從郡丞遊餘寒春未迴玄雲蔽冷日朔風捲黃靈枯  
惠胡不竟吾來值源竭

捨身崖

蛾眉備百姓怨女填六宮捐軀委崖谷隕生因爾容匹  
婦多白髮婦怨實無終

太華

太華復何如名山控西極忽從天地分屹立三萬尺天  
維西北傾扶持藉為壁風雷出毫末日月轉兩腋秦川

散餘秀長空借殘碧支離別周甸指掌觀禹蹟因知方  
嶽重奚覩介丘憶蒼旻仰猶高厚載真有力

三岡亭在邑西南三十里秦昭王使謁者王稽使  
魏夜與范雎言先生待我於三岡亭之南是也

賤人敢圖柄時哉天步艱相爾簣中意三亭寧覩顏佩  
印能幾時網成已入關宣言往代汝天道真可還

東津夜飲送岑穰彥休赴關

東門何煌煌驪駒絡金羈朱顏照秋鞠烟烟青雲姿往  
登芸香閣編書給諭廉予方滯江漢發軔將安之

風林舞危葉霜畦殺青蕒車馬如上州朝天逐高雲行  
邁豈不勞欲書竹帛勳歲晏重感慨我獨念離羣

曹華國之子贈詩次韻答之

平生曹華國志意多感慨塵埃迷俯仰翫辭遊方外余  
嘗賢若人心以古人待食藥甘有味舐蜜過潛蠶費恨  
沒九原長屯竟無秦宿草拚一邱長夜遂千載喜君好  
男兒贈語頗剛快弓裘解傳業門戶茲有賴文章第羨  
身長門不須賣來詩有賣長門賦之言

邃經堂

男子宜讀書讀書須五車紙腐唇自裂豈為刳心魚吾  
子少年時青雲得意初英華發清端賦筆凌相如自試  
文石陸竚召承明廬孝隱二十年復與志利書軒裳不  
掛眼鐘鼓悅爰居歸來邃經堂志惟與道俱架上數萬

卷偃仰時卷舒使彼夙昔人微言幸發撫春洲生蘭若  
寒溪脫紅蕖逍遙適所願未可詠歸歎上方宵旰暇夜  
殿誦子虛伯原曾進東都賦

送李德載公輔之宣城王子敏適之寧陵秦少章  
之仁和

先生位管轄四海在陶鈞顧我門牆士於焉益情親  
言給鼎味旨酒侑芳珍粲粲春服成暮春及佳辰載詠  
先生道興懷感昔人三子果藝達從政宜牧民維舟萬  
里流喜色照通津薦也不速肖農圃老此身同門各騫  
耇索居獨離羣諸公廊廟器行當策高勛念此今日歡  
無忘病且貧結駟僮肯顧促車清潁濱



送王仲求

飄風非焚輪觸石生孤雲逍遙王真人行行傲世紛齋  
戒斷葷臭日誦浮屠文散袍遊江海耻與狐貉羣吐納  
全真氣鬢髮垂如銀十年臨池學自許登右軍謙謙卑  
自牧處約人皆忻扁舟忽云徂欲扳心殷殷大夫重訣  
別兒女徒云云常聞釋氏說精進在懇懃紅塵易汨沒  
跋涉億力筋不如巢華山修煉如老君

送秦少章

建勲各有志而我齒已疎除書喜之子試吏東海隅滿  
懷貯忠義陳編陋嚴徐平生困末路龍蠖意不舒定交  
青雲表凜凜國士徒執顏肯顧我曾未鄙非夫破愁有

斯人我鄰知不孤危言解補天決折已非圖成名聊爾  
爾國器自時須收功從茲始良驥騫修途開樽稍黔突  
慚愧飯與芻閉戶待子歸看我所著書

同諸公餞望元因宿谷隱以何當風雨夜復此對  
牀眠為韻分得對此二字

雨氣天末來暝色江皋起層林蔽樓觀黯淡水雲裏匹  
馬何所從翩翩五公子異時天一方相遇忽在此温言  
各慰惜道舊半悲喜熠熠螢度幃泫泫礎流泚他鄉念  
羈旅况復餞行李一笑未易闌相望跡千里

秋江冒后土餘潦滿溝澮行人泥沒輶腐黍亂荒薈結  
客山中遊風雨在顛沛崢嶸棟宇下磊落宜我輩還同

竹溪逸笑傲盼庭檜繁陰阻杖履曠曠幾弦梅誰能決  
頑雲共此明月對

大木山

十洲三神山廣厚蟠地軸不知高幾尋滄滄及其麓遊  
心如太空視彼何芥粟君家三木山色裏一握足銛銳  
曰奇鋒均巖云峻谷攝心如虬蟄觀此乃陵陸高庠作  
九地何啻戰蠻觸老蘇記木山萬里在右蜀立之置庭  
除屹嶻可映屋小大雖相懸真贗此其族因形生彊名  
等是千歲木君家襄城野繞郭山抱綠巍然複領外自  
有真六六

孟浩然故居

盱食羹不糝肺腑窮雕鐫襄陽妙人物我獨憐浩然禁  
中拜天子布衣可逢年一言類缺望明主乃棄捐淒涼  
鹿門道舊隱空雲烟漢水不世情猶有槎頭鱖

上山

登山蓋有道迂叟真名論不因在徐行不跌由足穩斯  
言可銘佩萬事為節樽推之為公行天下國家本

從德麟至鄧城訪魏道輔故居懷道符

孟春屬佳辰駕言從郡丞尊食戒徒御篝火事徂征方  
舟絕橫漢適彼樊侯城緬懷昔封君能使晚周興千齡  
想風慨嘆岸與陵故城若墟落邑屋袖可憑盤殮勸  
舉箸幅幅氣拂膺古寺薇榛斃破舍餘殘僧人言魏徵

君於焉常曲肱宴居三十年蔚然以詩鳴人憂不改樂  
信哉賢者能常聞有四友作堂在郊坳我雖樗櫟材是  
味亦其朋會當從飛蓋清夜一來登

李良相清德碑良相百藥四世孫也天寶中為尉

氏今邑人立此碑

旌廉以廉寡樹碑勵貪夫後人慕前躅當令德不孤第  
無愧屋漏斯能遠苞苴番禹惟飲水合浦自還珠

阮步兵廟在縣東南四十里今墓在馬旁置廟  
阮之裔甚多而竹林猶存

千齡一丘隴誰復記主名必芬百世祠賢哉阮步兵廟  
旁故墟里竹林蔽郊坳裔孫仍南北胡能師九原

蔡澤廟燕人蔡澤相秦宣言往代  
范睢者墓在邑旁有廟

從橫事押闔揣摩相抵巇茲為富貴術吐嗟乃自知相  
形直誤人俾無百年期遂汝齒肥心廟食飽牲犧

羊叔子廟

緬懷吳晉氏天壤非異宇賢哉羊頭鎮一用惠茲撫高  
懷寄山水餘事整軍旅當年峴首歎奄冉隔今古遺民  
俎豆之廟貌塵江許誰令望碑人墮淚若兒女

杜元凱廟

書生昧籌算罕立橫草功征南日耽經帷幄明指蹤胸  
中有武庫矧與豎儒同賢哉秉節度不制蜀阿童沈碑  
雖好名要是真英雄寥寥萬山路爽氣搖松風

和錢之道

仲尼聖之時豈蔽不恭隘知命識大憂嗣世宅已壞不  
閱父母邦違及為削蹟依仁罕言利執禮不語怪汙墁  
泥中鞣脂牽速適適難乎其有恒取善僅舖饋苟非言  
抑揚大道或幾賣峽有食象地常苦螻蟻嘍昭昭神禹  
功鑿水疏九派刊隨神明疾新水螭唇快志士每喪元  
時靡可究屈

雜草

宿草競春力階除日青青何心願滋茂雜去輒復生一  
氣養萬類蘭藥盡勾萌何當紉余佩采采擷芳英

同仲寶風雨中過德麟留宿以夜未央為韻分得  
未字并和二公夜央字韻

悲風送寒雨遙夜俄總至草木雖戰秋渠能保柔脆盃  
盤照青燈哦詩久無寐安能決雲開坐見參橫未  
徂秋風雨多欲作雪霜迓况乃地氣偏寒暑或相借温  
涼久未定表葛易無暇慙愧平原君客至列盞竿日為  
文字飲短晷繼清夜嗟予寡世偶癡甚已如霸有田未  
歸耕無策敢求射耽詩近知味疑從果羸化  
敢有天下士鞣環之四方適願得所向偶如鐘應霜交  
態久未定市道良可傷君看江漢水安流日泱泱

張康節家西軒竹張福夷兄弟求詩

種花鄙弱植種柳惡連陰主人種竹意閭爽見靈襟猗  
猗復勁節凜凜况虛心晚歲示貞操清風應好音扶疎

高軒下衆景為蕭森世襲萬戶封奚取千畝林

夜坐

東郭新雨餘日入涼氣佳長風吹天維坐見參斗斜  
默羣動息寒蟬先秋譁清談互絕倒豈復憂過差

谷隱寺

挈策江湖去端為山水癖  
竭來谷隱遊契我賞心適  
寒江渺平楚復嶺轉層壁  
誰與龍象筵一掃狐兔迹  
綵雲布樓臺迎日麗金碧  
堂高磬聲遠松響激山光  
晚相照空翠濃欲滴行當  
就墟市幽棲買泉石日詠  
招隱詩時過彌天釋

題蔡君謨墨蹟後

古人托一枝身死名不滅  
賢愚置不論筆畫觀可閱  
嶧山刻秦銘斯篆屈金鐵  
雖在衆憎惡恨不頸荐鉞  
褚令猶且直還笏首叩血  
魯公秉忠勤白首抗希烈  
獨有虞永興當年稱四絕  
賢哉蔡蒲陽直氣亘南粵  
入為楓宸侍遇事挺奇節  
揮毫霸當年粲然星中月  
非惟驚代能乃是名世哲

嘯臺

步兵游方外棄禮真太簡  
過差生杯酒况復能白眼  
蘇門鸞鳳音戲技猶赧赧  
當知愧孫登不獨嵇中散  
步兵直曠達與世故浮游  
平時哭途窮鬱鬱宇宙幽  
浩氣獨不捥築臺凌清秋  
一嘯已望我况乃爾汝濤  
斯人

固遺世世亦不汝收得非青白眼釣銖悟時流聊為招魂兮釋汝故時憂

乘流忽遇坎為以馬觸馬遘茲遊紆餘上雲壘禪房忽

通幽水光浮西澤草樹颯已秋豈無竹林友腰印不我

壽異時東山約興盡輒復收飛蓋想清夜華月湛西流

何當共巾履一笑破羣憂

言登阮公臺興來聊獨遊因為爾時嘯景物故清幽奄

再古今意淒瑟天地秋阿戎迷簿領况復五君壽王實為監

至倉不北眺度遐想遺音浩難收登臨感陳迹雲散惜風

流輒車此裴回何以慰百憂

我登步兵臺緬懷昔來遊英聲入萬壑奇氣盤九幽轉

盼迹已陳况今仍千秋鸞鳳吟蘇門奚用愧彼儔堪笑  
劉越石幸勝功遂收登高君能賦乃是子安流作詩已  
可人洗我萬古憂

七夕某觀晉漢以來七夕詩數百篇皆用俗說某以為牛女之會不然故作此詩

七夕知何夕云是牛女期俚俗具瓜華階除兒女嬉繁

星爛煌煌流月湛沈輝羣兒望鵲橋橋端七竇帷彷彿

想言笑薶澤疑烟霏人間光陰速天上日月遲隔歲等

旦暮會遇未應稀願言停笑驩察我心所祈我欲賜新

巧智術妙通微金針度絲縷寶奩卜珠絲我嗟兒女愚

勤勞徒爾為巧拙天所賦乞憐真可嗤故拙不可壓吾

亭鈍如錐借云得新巧無乃醇愈漓吾觀天垂象列星

有攸司牽牛常服箱織女不下機牽牛教人巧積倉歲  
無饑織女教人巧筭篋餘裳衣伊誰詢兒女組繡窮毫  
釐年年渡河漢秋至次舍移宣淫五雲上此論乃吾欺  
吾為牛女辨欲判千古疑

元祐六年夏自陽翟之睢陽遊翰林蘇公自杞放  
舟至宋

放舟杞國岸汴渠正東注湯湯舟下水適與舟相遇泛  
泛水上舟與水共東去舟水詎相離曾不遷故處世人  
迷動靜順流疑若遡不然逐流浪汨沒為所誤吾作放  
舟詩明此流水佳老矣耄何為聊用持世故

石棧河在洪開

奔騰龍崎麓深壑斷如截石棧架寒溪盤陀卧精鐵從  
衡布方楚片段髮文裂平如中唐甃罅密不容泄南巖  
盡奇險萬狀森羅列或如巨獸蹲或類巴蛇鬪衣泉瀉  
飛磴流沫常噴雪山骨靜無塵泓澄碧潭激魚龍不敢  
宅中有千古月壯哉天地間此險詎勞設乃知山水心  
自欲為勝絕我陪勝士游茲名因不滅

足亭張康節南亭也臺數尺亭在其上

人生天地間海中一浮漚欲求無厭心無乃不勝求知  
足有真樂不然多悔尤淺儒急名譽夸人矜智謀語默  
偕蟪蛄生死等蜉蝣不知知足者澹然樂忘憂袖手閱  
萬變默坐觀九州衆舍吾獨存同波終異流君看至足

處無得亦無修萬物固皆備反照靡不周昧者疆務外  
巧為日嚮偷昔饑止願飽既飽思膳羞昔寒止願溫既  
溫思狐裘作徒漫自苦動輒成贅疣相圃有足亭可見  
好善優公孫皆秉哲克念踐先猷欲種豈弟德求異恩  
澤侯秀嶺嶺蒼瑛寒溪搖翠鈎雲傳鄧林雨月送滄浪  
秋曉暝竹烟暗午薰花氣浮涼颺泛南榮返照過東疇  
所遇皆可樂觴詠友浮丘豈必朝玄圃弭節夕瀛洲永  
懷樹亭意足焉此優遊

鳴琴泉

此水自山石中來水石相激於暗竇琮琤  
有聲如琴故曰鳴琴今為道士深池遂塞  
其竇水滿則不復  
鳴矣吁可笑也

昔聞流水操想見流水音况復山泉聲聲自如鳴琴可

笑山中人強作碧沿深暗流不復鳴遺聲杳莫尋近聞  
石鐘山蘇辨正古今酈元與李渤地下當噤喑惜乎不  
聞此使我徒登臨道人笑謂余胡不求琴心何勞絃上  
聲况此非徽金

下第留別舍弟弼

繆承名卿後煜煜贊皇裔閔途邁伶俜勉力濟顛墜百  
年能幾何三十已一世胸中經綸策偃蹇未獲試衰殘  
蚤二毛坎軻窮五技探珠極溟海耻逢驪龍睡辛勤禹  
門浪千仞復中躡吾道有用舍無乃天所否巖廊與溝  
壑榮悴同一戲俱非本來物吾無窮途淚季父勉問學  
弓冶付吾弟營營米鹽慮役役表葛計雖服貧賤勞無



捐剛大氣慎乃百勝術早拔萬夫萃老去重別離悲歌感棠棣

下第留別陳至

明緡釣香餌彼取亦已微金丸往抵龜我用一何卑余生宇宙間動輒多願違天王十二閑玉勒黃金鞵奈何驥與騾不使備六蜚鹽車初未脫伯樂第興悲寧甘生留餓不為場藿思京都足風埃士氣隨亦淄君於萬夫間獨若三秀芝浩氣久已定得喪亮難移對之忘忿戾澹然移安夷論交有斯人是用久敬之吾生三十年二十九非末路各相望奮庸會有時貴如未可求守余北山薇

嵩陽書院詩

束髮從政事佩綬曳長裾守令有民社裂地皆分符問之爾何由必曰因業儒自致或世賞因儒生任塗一朝希斗祿輒與故步殊佞夫專媚竈要路事馳驅俗夫抗塵容勾校迷墨朱自謂尚市道不若效賈區何必念故業易地有蓬廬嵩陽敞儒宮遠自唐之盧章聖旌隱君此地構宏居崇堂講遺文寶樓藏賜書賞田逾千畝負笈昔雲趨勸農桑使者利心巧阿諛飛書檄大農嚮此奉時須垣牆聚蓬蒿觀殿巢鳶鳥二紀無人迹荒榛誰掃除桑羊固可烹縣令亦安乎令主尚仁政美利四海敷仁賢任阿衡天地一朝蘇已責復蠲斂肉骨生膏腴

二十

東武李氏研錄

疲民悲按堵此地尚荒蕪淮西高夫子為政多美譽百里政肅雍民不困追尋情彼釋老子遺宮徧山隅吾儒一何哀廢蹟可嗟吁連牋叩洛尹移文諷使車義有子衿耻功將泮水俱興衰雖在天此意良可書却思嚮此者於儒於何諸又思昔縣令亦昔儒之徒興儒有美意無忘高大夫

史次仲錢子武與余在報恩寺納涼分題各以姓為韻

天地怒氣散凱風若顛喜吹彼枳棘墟不入邃屋裏北風何其涼雨雪雩不止卒歲無衣裘穴處猶凍死六月如蒸炊執扇猶秉燬芄芄黍苗花吹落不結子老農悲

不獲飛鳥喜自恣雖難答天恩願天投木李

鷹寓龍興仁王佛舍德麟公定道輔仲寶攜酒肴

納涼聯句十六韻

宿雨且初霽微涼吹廣庭嘉賓忽相遇方午夢驚扣局長松森翠影德修竹參青冥飄雲度空急仲殘日穿林明幽牆隔江浦公遠嶼定風於城市厭煩暑道山契念冷滂角中代公紘芳草具踰侯鯖園實摘的皪德厨醞斟晶熒烹鮮縮頸大仲海錯著器腥笑談得真樂公採擷逢幽馨雲陰剝初霽道夕嵐收遠青窗卧憶元亮方詩成懷景升日須何朔飲德當解高陽醒煩襟頓忘釋仲嘉詠不少停闈閣發嚴鼓公穹碧垂繫星一笑跨鞍

去奚論楚人醒道

啄木鳥

小蟲蠢堅木自意吻頰剛蟠身宅幽竇心期千歲藏爾  
非虎而翼何乃巧取將剥啄繞樹腹卷舌利鈎芒一身  
禍衆命曾未厭飢吮流怨入胡琴美人借餘商鷄鳩相  
唱和次第歇芬芳吾生獨何事有啄三尺長富歲常苦  
飢不能廢糟糠寧飢忍效汝豈復思隨陽

己卯春許昌湖上酬王寶仲弓作

紫荷媚曲塘青秧舞平畦晨光泣晞露衆木含華滋咸  
驚物外慕歸休及良時


封禪碑

魏公如管仲封禪止文皇侈心晚猶在厥婦故敢猖誣  
彼七十君哀哉為民殃

文選樓

案此詩從宋  
文鑑補載

中轅應楚聘鄒牧適梁苑藩侯喜賓客賢賢易鷹犬黃  
綺遊漢廷羽翼矰繳遠秦府十八公攀附名益顯昭明  
衆才子文囿俾蒐選高齋切浮雲雉堞俯晴巘尚應媿  
河間筆削非大典



濟南集

卷三

七言古詩

宋 李 鷹 撰

汝州王學士射弓行

汝陽使君如孫武文章絕人喜軍旅要治談笑能治兵  
 戲教紅粧樂營女白氎新袍錦臂鞬條脫掛弓腰白羽  
 綵錯旌旗照地明傍花映柳陳部伍須臾觀者如堵墻  
 彷彿如臨矍相圃一人中的萬人呼絲管吹嘈間鉦鼓  
 臂弓上為使君壽遍及四筵樂具舉使君一笑萬眾喜  
 堂上酒行堂下舞錦段銀荷翠玉鈿意氣揚揚皆自許

儻令被甲執蛇矛恐可橫行擒贊普大勝吳宮中令嚴  
兩隊宮娃啼且怖闔閭臺上呼罷休將軍雖賢亦痛齒  
豈知使君不忘戰聊以戎容娛樽俎夕陽卷旗去翩翩  
使君要客登畫船美人不暇別粧洗戰士結束圍華筵  
皆疑征南漢將帥樓船下瀨方凱還軍民不應有女子  
偏裨校尉何其儼使君湖光照樓船一碧不辨水與天  
漸看暝色著疎柳已見白蘋浮暮烟銀漢斜橫北斗談  
明月碧玉疎星聯舟人罷唱時弄笛艇子趁魚行扣舷  
隔浦熒熒見漁火意中竹籬青旂懸雖無荻花與楓葉  
全似送客溢江壖亟令周娘作新曲周娘琵琶京洛傳  
不惜千呼與萬喚便時轉軸仍撥絃馮夷陽侯或靜聽

穹龜大魚或後先且言白傅時落寞草草會遇仍嫣然  
使君聞名滿臺閣虎符熊軾聊周旋風流樂事雖可記  
皆過孫白二子前會看和戎竟先列鐵騎百萬臨三邊  
報功女樂賜二八粉白黛綠皆嬋娟青雲乞身歸舊里  
汾城故地依林泉琵琶亭中望汝海無忘飲中今八仙

題郭功甫詩卷

山人跨魚天上來識者珍重愚者猜或呼文舉異童子  
林宗獨謂王佐才蚩蚩俗衆目如瞽白馬羽雪皆皚皚  
古有仁賢不愚者舉足蹇路心徘徊桐城明府住姑孰  
襟裾蕭灑天與才讒言屢改耻白雪政事報成羞援媒  
臨川先生久知己十年執政居公台橫飛後生盡豪俊

往往扳越自草萊洪壚造化豈一端如何不與珽瑱垓  
盛朝能詩可屈指少師僕射蘇與梅少師新為地下客  
蘇梅骨化成塵灰金陵僕射今已老班班絲雪侵頤腮  
當今儒生迂此道如使杞柳為椽杯好古愛詩惟有君  
獨使筆力驚風雷清音繞齒嚼鳴玉爛光滿紙如瓊瑰  
古原夜燭光獨月立使萬物有灰煤清泉漱石白鑿鑿  
瑞落急瀨成淵洄才雄句險駭人膽九月秋水灑瀨堆  
有時清貞叩玄關至誠直可歆郊禘公才穎粟公望異  
牢落下位命何乖豈無白虹夜貫斗猶使寶劍豐城埋  
幾年令尉困下國板簡青衫趨郡堦猶將富貴委脫轂  
苟不知命安為懷竹溪逸人杜陵翁當年得意稱壯哉

直言時病傲宮禁謂可立志青雲階公行孰避蹲草虎  
由徑不畏當路豺輸忠獻策恃才藻宰輔切齒全班排  
遂離黼座謫千里翻疑方直為禍胎杳如躡雲上幽頂  
文石嶮屹懸虛崖下視黑潭鰐魚窟山雨潤澤浮蒼苔  
臨危惴惴懼石隕况更步滑粘青鞋上愬逢怒下見誚  
愠望寧與羣小偕秋江接天夜如練桂宮隱見瓊瑤臺  
泛舟夜披紫綺裘興發鼓柁傾金壘岸人疑是王子猷  
美女椰榆言謔諧滄浪水深波浪闊醉謂止可探一柴  
徜徉濯纓傲巨浸掬月不得翻委骸上皇雖悼屈平善  
千載乃得為朋儕秋霜何草不玄黃蜀山戍削青崔嵬  
馬如蹇驢不慣遠陟險色變成陔隕閣道繁霜曉成澌

古壑暴雨飛陰霾散關野哭夜悲怨倏見鬼燐明巖隈  
長蛇食象留齒骨猛虎噬人餘釧釵故人招庇豈憚遠  
軍謀宥密惟參陪春雨霖霖興槁苗膏潤不及枯根荻  
正風寢熄雅頌廢吾言來是單于埃古今廢馬詎為匹  
驂騮駟駱駕與駉力良調後惟騏驥李杜故得其梧魁  
前輩攀轅讓馳道下石夾轂謙爭推二公當年走聲價  
日月左運天旋回方今明時廢聲律將使湮淪如燼煨  
非君鼓吹力主持是道不世將傾頽關西鄙夫懷此憤  
白石空煉如女媧命違時否口常鈍如掛風鐸環堵齋  
安得獻言彤庭下出入金馬如臯枚秉鈞廟堂司慘舒  
建旌立節如張裴九齡說休度古云能詩多坎軻苟或信矣

良可哀儻使文章敵天下再使神禹驅秦淮

三月三日

柳眼脫殼花將飛麥梢弄黃青穗肥鷓鴣翩翩避舟去  
燕泥悞落沾人衣樹外浮陽湖水涿漠漠不動含晴暉  
沙暖浴鳧遺翠羽岸深老蚌吐明璣

黃河

昔我初為入秦客殘雪埋關閉長陌黃河二月凍初銷  
萬里凌澌流劍戟西風細卷浪花催日射寒光明瑟瑟  
歸時細雨正溟濛冷落關河已秋色驚沙慘慘塞雲黃  
遠樹昏昏秋水白濟川壯志愈衰遲日送烟波問河伯

自陝州渡黃河歌

流浪滄浪二十年三江五湖一釣船江神海若諳忠信  
此身常在蛟龍淵欲渡黃河濱小兒語相玩鯨鯢嗜人  
正饕餮忠信難憑彼方悍我嘗夜泛子胥灣錢塘大浪  
如銀山崇明海門水如墨况此相望一葦間為吾鼓漿  
為君歌氣凌河伯警鼃鼉醉披紫綺傲風波濟川遲暮  
奈天何

上林道

憶昔驅車度函谷解鞍訪古驪山麓華清雖有亡國恨  
繡嶺猶存舊時木無情草木競爭春不問興亡自紅綠  
漢家上林更蕭瑟宮殿荒基走麋鹿可憐喬木亦已無  
五柞長陽今樸椒

琴臺

廣陵散成不忍傳淵明援琴葛為絃乃知此樂潛聖賢  
直與天地通其玄我兄能琴人所先我非知音知自然  
或聞一曲山月前輕颺如坐春水船逆隨河源上青天  
口膠不語生醴泉鼓舞和氣如陶埏至樂默默坐忘年

少華山

少華連延翠烟永細路緣雲上高頂奇峯西奔入秦蜀  
幽谷南通接荆郢昔年蛟龍忽變化怒撼山巔壓州境  
山靈吐怪助豪強地軸狂推如轉梗盤龍七社萬戶餘  
卵覆巢傾伸臂猛近來又說神羊巔六里橫開罅如井  
居民惴惴已憂疑惟恐蛟龍怒還逞勿令岸谷復顛移



鼓鑄神功煩禹鼎

回心嶺

萬仞嵩峯接天遠妖武登封艱步輦初登峻嶺已回心  
何事艱難能黽勉亦似徽之泛剡溪想見王陽臨蜀坂  
老子山林興不淺興盡中塗猶欲返古人戒在未路難  
九十常為百里半世上風波更可憎心不可回聊自勸

次韻答張閭張閣見寄

我思佳人在何許太行之陽濟川上結茆賦詩臨清流  
我情搖搖日西嚮盤谷秋來陰復晴谷口與誰來耦耕  
賣刀買犢便能爾功名付之勃與平嗟余追逐老閭里  
吟詩作賦不直水韋編鉛槧幸忘憂甘與牛衣同卧起

相從當及壯年時莫年感慨定多悲此身安歸送歸客  
豈堪登臨行路歧萬事紛紛戰蠻觸不須白眼憎時俗  
但願如公無榮亦無辱臨流賦詩老亦足

田舍女

田家女兒不識羞草花竹葉插滿頭紅眉紫澹青絹襖  
領頸麤髹流黑油日午擔禾上場曬也喜年豐欲還債  
傭工出力當一男長大過笄不會拜有者四十猶無家  
東村定昏來送茶翁媪喫茶不肯嫁今年種稻留踏車

蚩蚩

氓之蚩蚩不足數四月五月濛鬆雨閉門縣榻二十年  
不見孺子與文舉

趙令時德麟作襄陽從事丁丑季冬出行南山三  
邑某同謝公定曾仲成潘仲寶攜酒自大悲寺登  
舟過峴山宿鹿門明日復自峴首目送緣絕壁而  
往上船山下相與酌酒而去德麟賦詩次韻和之  
鄒湛芻疆往過此幕中佐曹畏簡書習池峴首自今古  
故時悲喜成空虛越王之孫府從事惡人亦作俗吏呼  
日從雲間二三子醉吟嘯傲相攜扶王孫才高倦羈束  
溫紙詎可包於菟興來鼓權碧江去把酒賦詩聊與娛  
野人相逢荷傾蓋坐上作客慚食魚紅塵化衣對玉樹  
白髮茁鬚如霜燕飽聞襄陽好風土喜見山水相盤紆  
久憐消髀厭羈旅便欲卜隱如林逋著書雖可自覆醬

志怪猶為鬼董狐茲游起我丘壑興豈復自為形迹拘  
山中一屨可托足裘葛畧具便有餘結茆耒耜老巖谷  
豈學少室隨駕盧老妻汲澗芣葵薇丁男負芻仍掃除  
諸公富貴或肯顧結駟野服來吾居

謝公定所寶蕃客入朝圖貞觀中間立本所作筆  
墨奇古許贈趙德麟西未予鷹作此詩取以送德  
麟

君不見燕然易水波桑乾東連鴨綠西賀蘭古來戰地  
骨成土赤棘白草沙漫漫漢築朔方置上郡晚歲款塞  
惟呼韓貞觀文皇力馴制諸國君長充王官玉門不關  
障無候驛道如參百八盤遠人邦貢中國使瞻雲就日

游長安我恨不為典屬國望古遠集真可嘆今觀此圖  
寫職貢塗山玉帛潔衣冠南朔東西奉正朔想見膜拜  
皆盤跚聖朝賢良謝夫子勁氣烈烈霜風寒目移脣焦  
萬卷爛筆頭成珠墨成灘南陽勸駕一封傳入對三道  
朝金鑾萬言階對萬乘喜聲名一日青雲端行當遨遊  
廟堂上坐令四國相交歡羽書不馳烽火冷鳴雞吠犬  
何敢干長此聲靈歌赫濯不用斧斤摧髀髀內治外治  
無曠職天保宋薇湛露團君當身畫凌烟閣縱有此圖  
何以觀同僚華原貴公子求公此畫公無難乃知功名  
丈夫志不惑玩好勞肺肝憐渠孜孜畫成癖心欲速得  
如羽翰不如遣佐篋中品猶勝棄損終不看

德麟自南邑至鄴相會作詩次其韻

脂車欲入南山路馬首忽西真有數此生兀兀老江山  
曩事紛紛過風雨君行嶺上正穿雲我向津頭欲呼渡  
石門秀絕冠荆楚萬壑十年借指顧赴澗哀泉咽復流  
出岫閒雲散還聚遙應寫懷遠憐我瘦馬饑童傍江霧  
平時追隨若形影異縣相望忽如許他年兩翁各賦歸  
思山便可拏舟去

千齡檜

岡當老檜不記年古父約以千齡傳高枝凌兢倚北斗  
低枝猶藏萬壑烟蟠根直與地爭固不許蚓穴通黃泉  
陰森古恠神物附雨晦每見蛟龍騫賢哉樂天真逸者

手植蒼檜今宛然元和元豐五十紀婆娑下委纜及肩  
信此千齡尚虛云幾見海邊邱陵遷乃知不為斤斧天  
不在澗底與山巔

鼎足檜

巨根盤亘幾百尺高榦植立參天長蕭蕭氣清霜月白  
雲根桂子飄清香松陵高士風骨奇灑然臨流傲滄浪  
油雲委地墨欲滴霜風拂雨炎天涼鬱留執策信東鉞  
軍中舞劍語激昂幽林俯見皆樸樾反視茂質獨蒼蒼  
樂圃先生最珍玩如神偉象豈等常夢松蓋有三公兆  
蒼檜鼎峙寧非祥

樛枝檜

檜今老矣何兢兢樛枝下屈如不勝左松右栢非爾朋  
繁霜茂雪徒驕矜鞠敢不敢騫其肱午陰淒淒綠鬢鬢  
六月爽氣飛秋水縈紆茂密羅附藤猿猱臂絕愁難升  
老龍銜魚將飛騰矯首欲舉逢飢鵬

題王摩詰曲江春遊圖

咸雍山河互王霸涇渭為隍城塹華曲江臺沼備豫游  
祇與畫師供入畫長安城西山萬重昆明烟浪繞新宮  
新蒲細柳春風裏萬戶千門佳氣中我生不及開元時  
猶喜此圖今見之蒼莽烟銷橫短幅眼中終南倒溪淥  
傾城士女卷無人三月三時曲江曲老稚妍媸賤或貴  
來者携壺歸者醉筆端造化有能事各肖人人樂遊意

如今此地空塵迹石鯨縱在如銅狄宜春五柞更蕭條  
無復榛中得遺甓我願吾王明六符不蹈漢唐耳目娛  
池籞假民任改漁無令畫師為畫圖

王寶洗兒歌

樂道觀  
文長子

昔聞吉夢占羆熊今見得子如何戎先稱舉世稱至忠  
垂慶百世皆萬鍾山川秀氣久結融今復俾君生此雄  
五侯七貂十八公當有八元為八龍愧我塵埃非太真  
難使此兒名作溫勸君大作容駟門作詩聊代添金盃  
盧泉之水次韻晁克民贈隱人

盧泉之水名何長裂臍不到空莽蒼讀君詩句心已涼  
便覺滿耳清浪浪彼方逐臭如竊香肝膈鼠飽神鷹揚

有客飲水衣朝陽睥睨不語中何傷過從得君想更樂  
直欲造化窮微茫何當相從老此水桀跖夷齊均是死

邊城四時曲送盛璋東玉之官平涼

邊城東日日黃埃飛朔風葱嶺雪深埋古道河岸冰厚  
與天通可汗牙帳青海東壯士卷甲趨奇功公孫卿材  
名將種橫槩賦詩海濤湧作更宜思故家勇早取靈醜  
隸秦隴

詠齋詩

古昔詩客長風騷雲間野鶴鳴九臯六丁極天十萬遭  
攝提執策窮牛毛元珠罔象誰能及或長壯麗稱雄豪  
九原殺氣橫天高朔風吹雪沾霜刀銜牧束甲夜渡洮

軍中壯士秉白旄忿怒不可拔一毫白狐幾腋成一袍  
東溟一釣連六鰲二長不同各有勞吟咏至審公譏褒  
詠齋之樂真陶陶君毋獨樂愈自高亦當以手援兕曹

寄楊十三虞卿

前年居去時覆水均堂中三年君不歸昨夜風雨驚破  
屋不知生蛟龍壯士心耻隱忍拔劍刺潰癰三杯然諾  
許君死魚腹置七首直入吳王宮捉鐔震火飛吐氣成  
長虹義名如皦日英氣凌秋風

秦觀少章寄寂齋

臣門如市心如水漢宮解識尚書履形若槁木心死灰  
東郭子綦初隱几明珠走盤丸走坂性不遷遷常止止

蚍蜉戰聲如雷霆渠自紛紛相我爾達人  
大觀觀萬有區中狹猛真一昧唐堅涅白自古然不必飲牛憎洗耳

無渡河

無渡河無渡河中有龍門之雪浪天地之洪波上有碧  
崖之岌業下有暗石之嗟峨蛙蚓得志相譏訶况復龍  
蜃與鼃鼃崇朝一舍即我郊黎民一葦平可過無渡河  
無渡河招招舟子不足信彼亡維楫將奈何

自山中歸至登封遂諷高宰令取峻極中院廚前

石鐘板蓋唐人寺記字甚奇麗也

吳砧已碎樂生論京江昔沈瘞鶴名半栽紫陽立砧石  
考擊化度求全羸乃知金石有厄會名碑舊疊長安城

頃年醴泉有賢令政譽藹藹多流馨為憐文星足人傑  
昔皆耐瘞陪昭陵壞垣奠壤得顏碣榛邱棘壠求魏徵  
史訛遂正冲遠字石闕再樹六駿形板圖列籍示過客  
龜趺螭首羅齊廷後來謬令類俗子輒去其籍人皆懲  
昔到般舟訪遺跡季海寺記今彫零曉聞晨鐘呼僧粥  
石磬嘹亮穿雲清往觀乃是唐短碣大窮索縛乘前楹  
字形崢嶸筆蕭散遠過名殿諸題經勸僧拂拭置高壁  
安知野僧不我聽十年再游尚如昔擊拊刻劃將俱平  
急歸入城諷縣令立使昇至無久停此碑復立非我力  
奇物久廢天須興

有懷都下寒食

上國茲晨每豫遊仙仗繚繞未瀛洲天王高御寶津樓  
侍臣壁立環諸侯蕭韶引風搖樹雨晴波飛影動宸旒  
闌干仙人深霧縠樓前彩纜繫龍舟錦標霞舉奪日精  
萬楫競渡馳蛟虬天顏一解四海春樂歲已忘凶年憂  
况今持盈戒敬器不使逸豫常從流錦帆高張亦佳耳  
清汴東注貫揚州

真君觀

嵩山勝地神仙宅真君獨作嵩山伯潘師正謂門人以曰  
陶弘景為松山伯  
今百年矣扣帝求代帝令舉所知  
弘景舉余矣師正遂尸解而去昔聞解職扣帝閭厭  
此塵寰年已百天上百年一瞬間下土衮衮多腥羶勞  
神應念日月走暝日深哀膏火熬潘公欲代復誰舉仙

籍題名今幾傳憶昔元豐己未遊仙泉猶作雨深秋十年新事還堪笑廟貌今祠靈惠侯真君泉今作廟泉矣道士利其祠禱也

經史閣

方城范貺富而善教子作經史閣以藏書諸子皆有時名屬友人曾緯彥文求詩為作此篇

隱君扁舟離五湖初聞邑子驚陶朱多金不用五持術高閣惟藏萬卷書牙籤玉軸比四庫縹帙錦囊多五車河間闕遺應復購汲冢蠹簡嗟無餘碧山學士解傳業黃卷古人相與君謝庭芝蘭信靈秀竇家椿桂皆芬敷朱闌翠瓦照空碧秋山晚林扶疎寒溪送月出幽幽谷白雲因風生坐偶道山三館限清禁山中山樂彼所無

異時聯華涉嚴近白虎東觀文石渠願待善本校中秘母令後儒爭魯魚

求茶戲邱公美

公美方是靈隱來面上灰土衣塵埃自言夜借僧榻眠白日買酒不惜錢半月等得頭水茶欲求善價先還家君不見邊孝先瞌睡晝多眠點茶追清興誠與真性便聞君結交素奇偉朋友須求無逆意苟惠上品一斤來庶全見利而思義

王彥溫多恕許惠葉縣石方尊將以貯酒作詩取之

葉山堅石如水蒼斲為大尊重且方斟酌胡能問壘耻



獻酬不解隨解揚勿言研材用非稱麩葉文章皆伐性  
請看毛穎不中書寧及時時一中聖月巖老子飲山村  
但惜田家老瓦盆已刻匏瓜伐杯飲願君持此比宸尊

相逢行

平生不為輕薄遊故亦未作相逢行尋常本強畏犯義  
直欲端彥規後生有客性不羈謂我何泥固太上立德  
次立功癡兒乃為功名悞顏回窮凍終何成東山餓夫  
商自苦君不見白楊依依北邙墓斷碣滅裂礙行路觸  
體物化今何為劍鉞雖存委為土癡兒胡為不早悟我  
聞是言笑不顧樞衣布武出門去杳如乘鸞向烟霧精  
神流離不自據想像髣髴若神遇果見姣姘拾翠羽穀

袂障日揚輕素芙蓉倒影碧波媚薄雲映日光未吐冶  
容異公行聯娟美無度驚翩翩下烟堵游翔媚將高舉  
為憐牽牛久獨處欲解明璫贈交甫臨行惠我不語意  
定駕星駢為暮雨

崇福宮 崇福乃古太一所治今有太一殿存  
其後有太一泉今此宮頗摧毀

上都太一臨天街千乘萬騎頻往迴神崧太一古所治  
曷日厲車游豫來昔年章聖奉玄寂離宮萬堵臨崔嵬  
定陵弓劍隔重陵金碧渝暗暈鴛推重門銅獸閉永日  
靈囿御坐生蒼苔達官乞開奉祠事肉食罔知真可咄  
小臣作詩非望幸欲寫萬壑松風哀

壁間所掛山水圖

老驥無能空在間首翁既飽思行山誰知八幅分向背  
恍如百里隨躋攀雲烟濛濛心共遠草樹陰陽日將晚  
一聲幽鳥隔前溪萬古回春來疊獻涼風彷彿飛清霜  
奉身九折思王陽嗟我胡為不自愛逐物顛倒輕餘光  
瓜籬活計知何日相對無顏搔短髮芒鞋竹杖請自在  
皎皎吾身真匪石

聞角嘆

聞角吟聲正悲嗟爾行道遲遲兮中心有違女心憂傷  
之人未歸臨岐滿袖淚輕埃變污泥壯夫安爾為日月  
掛兩臆厲聲長嗟咨噫吁嘻李世無良臣御邊無上策  
輔桀盜貨財稽功數浮敲安知閔國步且要高官職勇

如漢將軍詭道作無益角本邊地樂相聞地遼邈漢家  
豈無大呂與黃鐘豈無鼙鼓與鈺鐺且欲震軍聲安用  
邊地角胡不嚴秋關弓莫使遠人來莫使琵琶之聲過  
河朔

作塞上射獵行

塞雲委地如潑墨惡風吹沙沙黃黑紫髯將軍柳葉甲  
銀駿護關白玉勒鐵林子弟八九千飲馬渡橋過河北  
沙漠默地古戰場寸草不生地皮赤將軍指呼令鼙鼓  
旌旆恣恣動堅壁壯夫露股挾纊溫蕃馬鞞脚寒有力  
迥手荷戈指欲墜氣結冰凌滿須歷前驅蕭蕭近林翳  
軍聲業業金草旌狐跳梁罔雨避虎豹驚駭喪膽魄山

根淺草枯槎材隱隱葉下見兔跡武夫張置四散逐雙  
兔雌雄中金鎬自云舍矢不失馳手持雙兔有德色凱  
旋如殪大兕歸喜非詭過無所獲常聞武功貴時習忘  
戰必危欲定國蒐田以時選車徒士卒素練務嚴翼季  
冬物成農事休民間庶類亦蕃殖泮上虎臣獻俘馘淮  
夷攸服遠人格悲夫王澤寢熄多鬼蜮蒙恬白起為民  
賊君不見長平鬼哭萬人塚擊破秦坑鞠饑白

贈卜者張生歌張歷陽人也

我憶扁舟昔南渡江心忽值蛟龍怒大浪崩騰舞我舟  
尾脅蛇涎東吾櫓怒聲如雷雷大烈腥風鼓天天如霧  
我觀蛟龍等一戲衆面倉惶獨無怖平生忠信天自知

死葬江魚未應悞須臾水天碧鏡淨順風入帆風若御  
歷陽古岸艤荒亭寒雲澹澹依江樹江南山水天下奇  
更在江山奇險處朱門玉窗帶青嶂想見君家傍烟嶼  
我今西來二十年夢寐江南見幽趨夫君何為抱奇術  
輕去故鄉踏長路胷中秀氣未甘蟄欲繼君平齊季主  
術高不肯等閒售惟喜遨遊卜卿輔爾來山郭坐空館  
憐我困窮為推數閱人多矣君自信歸去來兮余已悟  
少年飛動已知非老來憂患寧堪顧壯時猶愧不如人  
豈復衰殘疆馳驚倘來軒冕任去留縱有功名逼遲暮  
箕山之陰潁水湄二頃荒田安畝畝曲肱飲水吾自樂  
乘堅齒肥鳥足慕吾身貧賤吾自知不解脅肩求富貴

我如富貴當早得已可通侯封萬戶惟有退身可自如  
造物哀憐應不拒扁舟常繫屋南溪會當乘興江南去

胡為乎行贈邱公美

吁嗟憧憧之民兮何終身不靈耶不能揮毫縻青天耀  
白日胡為乎布衣韋帶事讀書不能坐窮廬運籌算胡  
為乎騎馬試劍輕其軀項藉耻作百夫勇禹行舜趨猶  
賤儒憊乎四支愁五臟不能成功竟何如胡為乎直待  
臨老空嗟吁盍歸乎來盍歸乎來長橋繫白鯉擺尾向  
天台風流李北海雄望摩九垓長卿向窮時尚為臨邛  
吟北邙古墓空蒿萊胡為乎須上黃金臺

趙德麟中秋生日

中秋月風露清清光倍潔皓氣澄霄萬象沉孤光散彩  
繁星滅中秋潮江海鯨波此日高倒卷東溟蕩平陸逆  
撼九江翻怒濤治平初年歲孰徐越王國却生英儒尾  
腰燕頤巖電目鳳準犀顙冰雪膚九天月華為爽氣識  
照古今窺聖秘胷中洞達不容塵瑩似太華無滓澱浙  
江潮頭為駿聲名滿寓縣高崢嶸詞源落筆波濤動馮  
夷陽侯皆震驚裕陵求人如不足蒐選羣材起巖谷網  
羅英雄至四海晚獲天麟在王族除書令上芸香閣中  
秘校讐專筆削辭榮寧作卿寺僚外遷肯入諸侯幕人  
嗟官冷久淹回我和解養王佐才聖朝方欲相宗室黑  
頭作公坐三台年年特班謝明主寶床禮物來傍午兩

軍戲伎侯掖門馬首迎歸入公府我雖無能世或取尚  
可與君為詔語

以古畫觀音易眉子石硯歌

疇昔翰林蘇謫仙溪藤寫贈眉石篇先生爾于南京嘗寫此篇贈廬欲  
尋此硯副此什婺源之水空茫然君家寶硯多奇石一  
一玄圭與蒼壁此硯初來眾硯疑厠居未居真可惜寶  
林大士千億身吾家古畫妙入神欲持吾畫易君硯庶  
幾速澄西來因我持君硯復何為嵩山之陽潁水涓茹  
慕咀藿坐蓬蓽漱流枕石書新詩萬事推遷皆傳舍世  
間孰是常存者畫硯伊余聊稅駕

冽泉亭詩

古井嵌空下如屋寒泉馥冽甘如飴昔人傳是龍蜃窟  
睡未千歲人不疑雲蒸每見飛靈火沉縵或惹髯間麓  
安得海奴秉犀炬乘月夜照窺端倪

東湖詩

翠荇弄水時出沒紫蓴浸滑涎蜿蜒川光遙接行潦前  
野氣空濶浮寒烟常思郢客解刺船豈解乘槎上青天  
又思吾兒能測淵豈能奪得驪頰蟾上昇却回復入海  
只恐澄海為桑田

對春詩

半陰半晴惱亂我不禁春意惟殢春黃鶯丁寧舌初轉  
楊花輕盈來弄人東家鞦韆多美女無腰娉婷衣金縷

彩索徘徊漸漸高墻頭人人羞欲住柳下誰家薄媚郎  
立馬昂頭不肯去一點兩點催花雨章臺走馬無塵土  
少年去老能幾時買笑金錢不須數高陽酒徒多白髮  
長安佳妓令老嫗共君把酒莫厭多作意疆作青春主  
文章放行多氣焰筆畫把捉無精神願得神王如六通  
日寫萬卷酬青春

某頃元祐三年春禮部不第蒙東坡先生送之以  
詩黃魯直諸公皆有和詩今年秋復下第將歸耕  
潁川輒次前韻上呈編史內翰先生及乞諸公一  
篇以榮林泉不勝幸甚

半生虛老太平日一日不知人不識鬢毛斑斑黑無幾

漸與布衣為一色平時功名衆所料數奇辜負師友責  
世為長物窮且忍靜看諸公樹勛德欲持牛衣歸潁川  
結廬抱來箕隗前祇將殘齡學農圃試問瀛洲紫府仙  
精思觀崔道士授劍栢中劍常吼若雷

陰陰老栢森庭牖外脫中空若虛缶崔仙授劍栢遂神  
劍氣騰天劍聲吼頃年天師受訣此地精思歲華文玉  
函金匱發靈崖因使陰符誣虎口張天師道陵得九丹之訣于崖下于此地  
精思累年然後得之云殿中真人道玄筆筆妙飛揚傳不朽霜髮

羽人逢白叟間歲已聞踰九九神游八極吾所願道骨  
仙風愧無有欲賦大鵬思子微恐爾年齡亦為偶梁觀主八

十三歲

張居士歌 并序

張居士名拱字輔之誠信教謹之士昔遇異人以蒸棗七枚食之云餌此當終身不食拱始疑而漫食之果絕粒二年行步輕捷神氣冲散拱云欲不食則便可不食不問久近欲食則日可兼壯者之食五人亦未嘗飫也拱善醫世家京師龔章之甥龔夬之表兄也

凡夫冥冥不知曉劫塵流浪沙如掃上天宮闕隔青雲九原壠墓空秋草神仙有意憐下土獨取飈車出三島張翁陋巷貧且賢簞餉瓢漿久懷寶羽客飛來自何所蓬華相迎笑相勞高談妙理道本來定是青牛度關老

仙丹無形有真氣一視傳靈入凡棗聊分七棗遺張翁一餌云充千歲飽張公不食今幾年齒如兒童顏色好我聞神仙本無滓諸漏皆空體玄道姑射神人飲風露淮南雞犬依丹竈真詮自然本簡易不在勞形勤補腦封山航海漫殫費葉衣草茹空枯槁况乃紛紛五濁世粒食火化常熱惱余苦風塵哀太早綠鬢蒼蒼半玄縞青春堂堂暗中去常恐餘生似潢潦何當刀圭借殘齡相與神游超八表

鍾山鐘

延平雙劍朝豐城鍾山之鐘挾以行延平春浪拂天地左右兩龍雷大鳴建隆真人君八極河伯效珍寶鍾出

不似汾睢發鼎光泛泛逆流浮萬鎰詔賜閭闔濯龍宮  
聲掩景陽聞九重吾聞此鐘亦神物獨肯寒溪就埋沒  
舞陽令祝樂天再任

庚寅十月二十五曉分黑帝臨丹府怒來鞭掠玉麒麟  
下降英靈佐明主廬江從此生奇賢便是奇人祝樂天  
鼎沸絃歌一百里雙鳧舞水又三年部民共獻長生酒  
鸞鶴莊椿只依舊我詠蟠桃別有春何須更祝人間壽  
元祐六年夏自陽濯之睢陽迓翰林蘇公自杞放

舟至宋

發軔嵩麓背烟巖解維水程仍二三杞邦想見舊風烈  
許邑自知誠子男天地憂懷真過計文獻不足良可慚

放舟適未觀君子白頭終期老江潭

擬楚詞并序

段文饒道充蒲城人也訪余於京師時道充將  
歸隱于渭濱故作楚人之詞以觀其歸其詞曰  
匠執斤兮道周稱百尋以弗用兮谷之詞以論困以為  
杯兮孰謂賢于杞柳揉吾性以矯真兮寧全文以為壽  
樂吾樂兮樂不汝違樂不汝違兮盍歸乎來哉犀何尤  
兮以角累象何咎兮齒為裁童牛天兮職駢剛而繭粟  
龜告猶以灼兆兮寧泥中以曳尾珠綴旒兮悔夜光不  
祥玉為圭瑞兮痛山輝之為殃樂何樂兮樂不汝違樂  
不汝違兮盍歸乎來哉蘭九畹兮芬薜芝三秀兮焜煌



山嵒嵒兮呈姿川溶溶兮搖光風駛駛兮歷楯雲續續兮度梁葯為衣兮薜為裳椒為醲兮桂為漿樂吾樂兮樂不汝違樂不汝違兮盍歸乎來哉

嗟美人詞

樞密直學士劉公希道久遷于外元祐天子方欲大用于朝而薨余心哀之故作嗟美人詞以弔之

嗟美人兮何之撫千禩兮增悲咎司命之匪仁兮弗庇下民故嗇數于今人兮俾弗儼乎常期既閔端之引大復柅止而繫維仰天衢而願騁兮羌為惠之罔終嗟美人兮懷思闕靈修而自珍兮寧燕婉而倚巾彼鶉鴉之

早鳴兮欲衆芳之隕衰亮汝懷之匪良兮善佳卉之具腓靈芝逞恤汝以自芳兮亦三秀而呈姿侯蟲呻吟而競秋兮熠熠夕飛而流光蚊角翼而虎噬兮或負岳而成雷俄歲運之徂征兮復爾齡之義何彼大椿之先秋兮意松柏之後凋屬歲之太甚兮雪霜窘而煩威春歸來兮暘谷溫條風發兮百卉菲土泉閉兮崔嵬獨玄黃兮就萎萎長年兮澗濱匠初顧兮弗辰感佳時兮嗟美人蛻遺榮兮上賓天我籲天兮九閭如可贖兮百身

驪山歌

案此詩從宋文鑑補載

君門如天深九重君王如帝坐法官人生難處是安穩何為來此驪山中複道連雲接金闕樓觀隱隱橫翠紅

林深谷暗迷八駿朝東暮西勞六龍六龍西幸我肩棧  
悲風便入華清院霓裳蕭散羽衣空麋鹿來遊墟市變  
我上朝元春半老滿地落花人不掃羯鼓樓高掛夕陽  
長生殿古生青草可憐吳楚雨醯雞築臺未就已堪悲  
長楊五柝漢幸免江都樓成隋自迷由來流連多喪德  
宴安鴆毒因奢惑三風十愆古所戒不必驪山可亡國

觀吳正獻真詩

案此詩從宋紀事補載

次公不許畫麒麟孝宣妙選知名臣拜公之像想風度  
乃是雲臺子顏之文孫元豐天子建原廟玉宇萬棟臨  
端門累朝名臣儼冠劍列聖御坐開乾坤修廊祕殿鎖  
春色彷彿音容皆駿奔皆相業皆元元旂常彝鼎足書勳

儀形在歿侍神考英氣靈靈凝天閣嗣皇方思服盛美  
欲考辟公觀列文君傳茲圖落人世世人遂得知瑜璫  
吾知袁公固有後能平楚獄竟無冤召公甘棠猶不伐  
衛武之德誰能謏君不見温公之像滿人間願廣此圖  
令並傳

濟南集

卷四

宋 李 鷹 撰

五言律詩

方竹杖和功遠

性稟方外正人憐節瘦輕持携防水潦殺活奈山精直  
以中圓稱名行義類清若將靈壽比未可賤書生

同張公碩梅耕道訪董畸老郊居

白水弄青秧晨烟著柳行翳懷正飄泊陂路轉微茫頻  
隙鷺鷗下滕邊菱荇香相從尋勝事蕭颯興何長

灑水官橋路將軍甲等新綠沈間結鑠斐几淨無塵下

榻喜賓至問田隣我貧相逢便傾倒晚歲定情親  
青雲兩高士肯伴老夫游方駕相追逐通宵復獻鱗詩  
書嗟失計農圃話良謀日後耦耕伴懸知總白頭

秋菊

春葩富紅紫黃菊與秋宜風勁幽香怯露晞寒艷滋孤  
標雖獨步呈秀此何遲欲待羣芳歇專榮占一時

秋郊

郊原千里望好是暮秋時欲盡登臨興惟應杖屨宜鷄  
鷓方得意燕雀彼焉知黃犬蒼鷹去誰家年少兒

出城

岸走舟安穩道遙若步虛晴烟迷白鷺春水見浮魚桑

樹連枝種人家夾水居年豐村舍好稚子學詩書

秋山

山色帶晴雲雲山遠莫分寒林迥蕭散秀氣自氤氳定  
有邱園士彼同麋鹿羣弓旌訪巖谷誰為上方聞

寂歷古關道二首

寂歷古觀道早秋生曉寒空濛朝雨細憔悴各衣單事  
逐烟鴻遠情隨雪鬢閑蕭蕭倦游意天際路漫漫  
寂歷古關道曉烟寒未分愁情滿秋草歸思隔黃雲客  
路自多感宿醒猶帶醺蕭蕭倦游意况乃久離羣

秋鶯詩

秋日生春意林間聞曉鶯奈何時序晚不及候蟲鳴搖

落無多感芳菲會滿城好音宜自默反舌可無聲

秋扇和之道

過時悲既往適用復相先世事莫生隕人情月晦圓寒涼非爾適哀歌豈余捐歲事時秋斂農夫期有年

續題郭功甫詩卷

詩道今蕭索騷人古困窮夜寒金殿冷秋盡蜀關空厖隸縻宛馬壇巫誅守宮採珠探水府絲黍慎蛟龍

戲贈史次仲

世俗匪吾謀嘉篇常見投舊交皆炫曜夫子猶淹留禮樂尚虛氣衣冠何自囚祇應涼冷後蕭颯更清秋

秋曉

秋色已飄零淒淒曉更清蕪城宿殘靄雲日遞微明瓦冷寒霜色庭空槁葉聲悲歡更盈耳蕭鼓和鏡鉦

青泥雪中 和德麟韻

君笑吾癡絕吾知自不癡遠游陪勝士歸橐有新詩笑覺山途近寒因酒力遲相從畏嘲謔別後復懷思

秋蝶

粉蝶爾何知秋深尚戲飛憐渠迷節物猶若露春暉弄葉今未昔霜叢疇可依籬邊菊無幾薄命寄餘菲

宿路北

晚日明青嶂春風送馬蹄數朝秦嶺北今夜洛陽西禁水綠波滿蕪城碧草齊客心歸更速解轡恨棲雞

分題得古香爐

分韻得邊字

質為浮休棄形惟好古宜  
挺陶異甕礫香火近神祇  
冷暖非恒德興衰彼一時  
舍茲何所適爾意勿遲遲

和次仲硯詩

聞道端溪好疑應為土風  
彼人非博識此語未為公  
野客雖云美才華恐未同  
漉毫滋墨外文渙亦徒空

秋溪

秋溪已澄澈山色貯溪中  
雲度前州白霞生別嶠紅  
波瀾寒自鑑魚鴈共遊空  
棄置功名念羊裘作釣翁

釣臺

釣國固有術直鉤寧漫勞  
吾常鄙龍伯豈復羨琴高  
濯

足風波地遊心虎豹韜  
誰云無是子天下自囂囂

此地有天險雙臺千仞崗  
眼寬知世窄望極使神傷  
惓澹諸峯立縈紆一水長  
振衣懷古罷新句入斜陽

秋風

萬籟靜中起扶搖風怒號  
半天鳴劍戟平地卷波濤  
鷓退宋都絕鵬搏溟海高  
賀蘭吹不盡何用戰蓬蒿

陸龜蒙有

范蜀公挽詩

章

蚤歲青雲近英聲四海馳  
能懷天下寶獨讓中月枝  
既已龍登坂咸觀入鳳池  
如何老清禁偃蹇卧明時

公禮部

仁人宜有勇無欲過能剛凜凜回天力危危極諫章一  
言扶日御萬古正乾剛首犯龍鱗意淵忠亮未忘首乞  
慶寧雖首議濮廟一何公君子初無黨賢臣未盡忠死  
生全大節社稷倚元功疾彼梁邱子依違祇向同公力  
廟

荆舒昔未懲抗疏誓身爭衛鞅雖難屈桑羊屢請烹危  
言知不用脫屣謝浮榮豈戀三台近全無萬世情

直氣犯荆舒承明下玉除禁林餘諫藁蜀道擁安車自  
謂三宜去吾知衆莫如誰謂忠義傳事事舉堪書王荆

為制落  
公致事

嗣皇思故老趨侍侍筵經駟馬空頻駕高鴻本自冥蒼

生雖絕望威德愈流聲出處俱全節輝光並日新元祐  
天子

起公侍  
讀不起

關雎久盈耳魏闕亦游心不廢江湖樂親調鐘磬香九  
重初擊拊千代正哇淫器在人亡矣哀哉淚滿襟公奉  
詔修

新

重望晉隨會清明越大夫忘身安社稷寄傲老江湖黼

冕固已遠黃金猶可模旌賢宜異數願上孝宣圖

八十雖云壽吾嗟未及期方之昔衛武猶不至期願幸

處仁人里叨膺國士知空餘戀軒想况復九原悲

衆樂西南圃從公數共游清無馬融悵榮預李膺舟河

漢德星隕山川英氣收孤生築場意索寞向新邱

光祿朱卿挽詞 十首

自信仁由已深知道滿門才華輝日域嘉譽達天閭坦  
腹方趨進亨衢逐駿奔欲令唐晉後不獨美姚温  
要路多知己期公集有庸行趨青瑣闈榮拜紫泥封帝  
室常虛席侯邦久卧龍空餘遺愛頌安得鏤斯鏞  
省寺官聯貴曾升社稷臣雙瞻觀日月接跡望星辰錫  
爵雖開國封侯未富門天扉如可到直擬問通津  
南國舊書生今雖老更榮朱轡頻補郡白首到名卿牧  
守惟司命官曹任老成道字姑已矣何患不聲名  
疇昔始龍館能聲到海隅兆民方采色境政獨蒲盧尚  
賴德彌邠安知今也無猶聞江左郡荒政後來蘇

七十古來稀公忠况未衰言常思悟主更老惜明時雪  
髮丹心被君恩寶劍知如何天不憖直道竟何施  
樂圃林泉好藤蘿蔭古臺仰攀高節處豫約掛冠來涼  
月空堂影新霜百草萎清行樂地履跡滿蒼苔  
滄海夢悠悠關河壯氣收魂歸傷委脫壑迴失虛舟月  
暗菰蒲夜山空木葉秋可想頻悵望松梓繫新邱  
五十雖非壽休嗟不憖遺賞延姑可待子貴竟何遲異  
鵲驚蟬蛻淒風落木芝乘驄千里客歌罷不勝悲  
蚤悟多金累惟修儉與仁考終雖罔愧直道未容伸地  
想流謙德天惟賚善人昭昭錫繁祉餘慶在振振

賀蘭先生詩同陳恬叔易和節度使王漢忠韻



陘隘區中世殷勤招隱篇應居小有洞幾見大椿年菴  
廢雲埋谷琴亡聲在泉至言曾悟主持此合昇天菴臺在嵩

山承天觀  
鳴琴泉上

顏魯公祠堂詩

竭來游汝海初識魯公真威德宜蒙視英姿儼若神典  
刑雖異代勛績在蒸民憶昔艱難際生逢歷數屯羽書  
來葯漢邊馬度咸秦河翔皆朝敵平原獨挺身蠟書通  
帝所羽檄論邦鄰許國心無二孤軍氣復振弟兄同義  
烈生死劇酸辛已怪酬庸薄那聞位降頻江湖銷歲月  
省闈悟經綸相國心多忌軍容憤復伸同朝緣如媚一  
諤俾遭迤輒墮姦邪計剛期跋扈馴啞凶令履尾納諫

為嬰鱗假手雖云智擠賢太不仁茹鱣蘇武餒決背蘭  
生嗔誤問長安使寧為叛將賓一時全大節千古仰清  
塵面想神如在推遷跡已陳謀謨存汗簡字畫徧蒼珉  
論世吾求友之人德可親詎云黃壤隔猶勝白頭新端  
欲希忠義常期齒措紳今雖逢聖旦止願作良臣惟冀  
尊王室寧思秉國鈞倘今冠獬廌猶可畫麒麟古寺今  
如昔泉高夜不晨何人同李翰紀事此張巡感慨瞻遺  
像潛然淚滿巾

程高承議赴夔路轉運判官求詩

聖音躬仁政羣方布詔條洪恩温海嶠嘉頌滿窮荒聚  
斂除姦吏依違屏具僚鈞衡無碩鼠城社絕餘妖皇化

思無外王心遠欲昭咨詢黃閭老選命紫宸朝丹禁傳  
天詔飛星下使軺書旌分蜀道攬轡步烟霄急峽瞿塘  
險孤城白帝遙巴山連浪遠漢節拂雲飄按部清時好  
觀風樂事饒詩成思老杜鬼哭想殘蕭已佩黃金印當  
簪七葉貂不應淹留僻陋從此上扶搖

上翰林眉山先生蘇公

佑聖生賢佐天心在撫民嚴期膺治運穀旦降元臣四  
序功成晚三台耀拱辰嚴凝氣剛勁謇諤性忠純凜凜  
風霜操優優雨露仁高才映今古妙學洞天人黼黻文  
華國淵源德潤身四朝師令望百辟仰清塵躬策明三  
道觀光耀九賓咸知帝賚說復誦嶽生申視草金鑾殿

登庸鳳詔春變龍名不隕魯衛政相因交蔭槐陰茂聯  
華棣萼親廟堂熙帝載袞繡並天倫政柄勞無憚侯邦  
逸久均偃藩心固樂調鼎味宜新上宰虛黃閣除書下  
紫宸百神懷景福萬化入鴻鈞陰德施黎庶休功格昊  
旻自當侔帶礪詎止約松椿賤士晞高躅趨風愧下陳  
願言千萬壽獻頌敢辭頻

小蘇先生九三文自司諫拜起居郎權中書舍人  
寫作詩以賀

孝治依文母皇圖錫聖王虛心思啓沃妙選盡忠良近  
侍崇儒術先生被竈光周邦柱下史魏闕紫微郎禁殿  
聯常棣天池浴鳳凰揮毫青瑣闥簪筆御爐香德鎮千

鈞重文輝萬丈長昌時逢式穀吾道喜彌彰視草嚴宸  
暮論思子夜夾槐邊星轉角花底鷺分行豈但居華省  
行聞上玉堂終期袞衣拜慰此士夫望

贈錢子道武昆仲

青冥聯翼鵠志節傲雲機凶變家多難年荒歲愈飢運  
乖生事拙貧病壯心違蚤歲憂虞少今春弟妹氣悲  
靡鹿馬心感動搖識命矣傷無已時哉難式微自  
從中夏渡半減去年肥氣聚摩天鷲文華耀日翬飲川  
容龜巢障日讓犁犂南畝時躬稼虛堂晝掩扉有秋緣  
力穡高節本知幾路入東城遠人行北道稀樹頭雲藹  
藹草際蝶翻翻古岸連樊圃秋城秀巖嶽斷洪流滓滓

獨木過欹巍擺極香紛馥菰蒲綠映圍訪君非旦旦相  
見亦依依為問奚為樂言他復謂諱孝思誠辟色僚隱  
始深譏不見前賢者何嘗慮世非浩歌行拾蕙雩詠浴  
于沂儼雅誠詩社淒涼近釣磯夜階鳴蟋蟀秋砌嚮蚱  
蟻竹塢留殘月林虹帶落暉龜番朝露葉魚動落蓮衣  
詩句時評品曹劉幸發揮鮫人龍頷寶海客蚌胎璣子  
意將全美余心久所晞衆人皆捲石高論獨其頤掩月  
蟾蜍泣飛霜蕙草歲鯨魚翻海濁水碧帶魚飛正可夷  
崧岱公何愧隱扉剛明文豹節升降二龍旂月滿星藏  
彩霞升燎有輝愁魔攻肺腑危坐復歔歔

七言律詩

和湯元忠主簿觀魚

輕瀾汚滿帶維舟  
新雨羣魚藻際浮  
既亦非知梁上樂  
敢嗟彼有釜中憂  
漢江水濁斑衣獺  
楚岸烟深雪色鷗  
未作金龜莫驚悵  
月澄清海漫如鉤

過昆陽城

昆陽城下黍苗稀  
寂歷荒墟隱翠微  
遠想龍蛇方鬪野  
解驅虎豹使成圍  
烏知將擁河流斷  
定喜能令屋瓦飛  
白水真人今物化  
春陵惟有荷鋤歸

和錢之道遊虎邱二首

輕雲細雨放花時  
才過清明已夾衣  
拚得酒時教盡醉  
可題詩處莫空歸  
丁寧鶯語機關巧  
輕薄楊花氣力微

閭闔晚來行客盡  
稚烏相趁入城飛

石頭槎牙占官道  
松樹老怪枿斷雲  
驪龍睡隱潭水黑  
雨積糞壤生朝菌  
山光繚繞林樸椒  
野氣空濶雲氤氳  
歸來月落天色暮  
莫水邊游女澣紅裙

商高宗陵廟詩

築巖胥靡繼甘盤  
此道寥寥不復存  
古廟秋風塵黯黯  
故陵烟霧月昏昏  
君臣難遇真千載  
岸谷誰知舊九原  
魏尚端能似頗牧  
獨無新夢到天閭

厄臺

今古俱無忌憚情  
厄臺猶敢尚為名  
裔孫不復重瞳聖  
俗目俱同瞽叟盲

陳舜之後

見愠仲由空翫髀  
膾肝盜跖尚

彭亨聖人道大故難用誰聽茲歌兒虎聲

宿大賈村僧寮

行過橫烟香霧中  
低低茆舍繞高蓬  
磨門見客僧如鹿  
席地圍爐火自紅  
隙壁射來千里月  
破窗吟紙一川風  
僕存密勸休安枕  
聞道穿窬是主翁

哀都官王申

壠上弓旌降鶴書  
爻爻壁帛責鄉閭  
漢宮入奏賢臣頌  
蜀道榮觀駟馬車  
誰謂諸侯老賓客  
歸來華髮伴樵漁  
泮宮陳迹人游否  
絳帳門生多石渠

大雨中遊嶽寺

忽見微雲別嶠生  
急緣危磴下崢嶸  
勢傾海岱千巖黑

力卷江湖萬葉聲  
碧瓦依稀人暗喜  
急湍漲馬初驚  
老僧宴坐朱門底  
應笑狂夫冒險行

鏡屏詩二首

曲玉回輝瑩可觀  
秋冰壁立動涵瀾  
每嗟許國酬身晚  
忽覺餘光照膽寒  
暎坐未容華表客  
整簪空慕鷄鵠冠  
雲車一去橋山晚  
寶鎮于今下古壇  
凝澄不動水淵槃  
風拂泉生或細瀾  
月影透簾朝日薄  
龍輝繞匝夜光寒  
元冥借魄知神物  
男子無間已弱冠  
照我精誠至  
麟閣緩隨弓劍上  
仙壇

和二兄書事三首

諱遠字國器居蘇州時瘡疾未平

年少看書耻未多  
壯心今歲沛中歌  
帶江黃幟有躡趾

舉國白頭無絳何為我忠謀能有幾匪人阿比敢言他  
手攀荆葛藤蘿近敢把新涼取次過

連進內清云多楚古塞羣雄尚感歌血饗彼招神苟幸  
廟謀非壯士誰何將軍威信當詢衆決勝神機豈謂他  
試把香囊問少子淝川投策夜潛過

功名於我實何多祇為浮華未浩歌兩月病痞誠已甚  
半頭白髮似無何詔惟選顛將從衆學貴師心在匪他  
當世聞人知不少片言敢謂衆難過

和鄭十三東齊言事二首

為貪軒冕未忘情寧使棲遲抱六經安得神仙斷鯨劍  
拂閣雲翳露天青霧濃元豹終朝隱水薄猜狐抵夜聽

昏墊直疑皆飲鴆沉冥何苦辨清醒

春光故故惱人情新葺茆茨欲醉經積雨水衣龍領滑  
晚晴山翠佛螺青月邊柳色踈踈見風外梅花細細聽  
半夜白月生石枕潤珠蒸濕醉魂醒

答孔槃處度見贈

我似羈縻遐徽州君如霸府大諸侯如何鼎食素烹飪  
乃謂溪毛堪薦羞駑馬但能追十駕鉛刀奚可斷千牛  
鄙人粗亦知臧否敢請林宗共濟舟

高頂六月芍藥初放

誰言天地一無私底事陽和到頂遲暑氣已交五六月  
雲中初見兩三枝可憐下土炎蒸日却是青霄爛熳時

第有榮心莫嗟晚物情先感復先衰

和人寄寇昌朝韻

久料騰驤空冀北如何留滯困西南聞君載酒訪狂客  
把酒為君當劇談上國分攜今已久丹砂未就我慚懷  
六蜚駕馭須天馬吾恐驂騑備兩驂

楊十三虞卿在希顏上人房納涼余時在村舍歸

和諸公韻

土渴山焦獨在阿考槃孰與世相過皇皇夫子猶傷鳳  
碌碌蒼生尚執柯頭白已驚為學晚余十九歲日長羸  
得請書多北禪釋子應相笑樹瘿多年變木鵝

曉行聞鶯

花梢未動雨中聽催編園林百果成六月不知春色盡  
五更來伴夏雞聲樹頭蕭琴長風過馬山管騰短夢驚  
勸汝無言歸舊谷先秋番次候蟲鳴

雨中游法王寺詩

雨脚如麻未肯收雨中還作法王游雲埋輦路烟初合  
水濺松巖雪亂流心畏險途常恐失寒侵病骨已知秋  
羣峰聳峭猶無畏為語山僧不用留

少林寺詩

禪老家風古少林道場遺跡寂烟岑山遮石脚斜陽早  
雲礙鐘聲出谷深隻履度關天杳杳九年面壁海沉沉  
欲知苗裔能傳法栢樹猶明聖主心

習池詩

陳迹相催今古同池邊倚杖送歸鴻童山尚接千巖秀  
穉樹猶傳萬壑風春意物情迷野興水光天影共青空  
雍門有淚應承曉繞墓行吟弔習公

習郁死  
葬池上

次韻劉厚之久陰未雨

欲作豐年幾日霖密雲委地結繁陰莫疑造物收功晚  
自是陽和著意深且具黃雞傾白酒更求青李與來禽  
掃除萬古窮通想付與南薰一弄琴

過閻氏橋

綠芰紅蕖照眼新池塘風軟起青蘋遠山碧映重林墓  
妾往香傳別洞春五月獨為長道客滄浪自有濯纓人

誰知雅意在印壑慚對箕嵩愧路塵

范蜀公得請再致仕蜀公作詩命某次韻

老戀林泉拒袞衣高山景行衆思齊久膺重任當先覺  
獨以清風激衆迷越相家聲千載後商公舊隱白雲西  
坐令貪懦趨忠厚寄語狂童勿芥雞

謝王生贈弓矢

將軍材氣舊無雙老矣猶思壯挽強金甌願乘千里馬  
玉關歸奉萬年觴受降城下沙場雪無定河邊木葉霜  
贈我良弓借餘勇君應真勝楚人亡

和人九日詩

三徑就荒陶令宅兩峯高並杜翁情悲秋不奈黃花好



落帽誰憐白髮生  
遠岫白雲收  
細雨晚林丹  
葉弄新晴  
登臨倚仰寰區隘  
欲駕風輪更上征

袁高氏石公之墓

黃金照地晉將軍  
劍履盈門萬石君  
獨以德名追遠裔  
盡將富貴比浮雲  
瑤田種藥期公壽  
夜壑移舟忽夢分  
彷彿平生阻瞻覲  
一詩三嘆漫殷勤

再上閻邱通牧少卿

東邦濱海帝憂勞  
慎迪名卿禮意褒  
板簡拜旌前憲椽  
雲駢駢馭舊仙曹  
庭柯露下回春色  
夜浦珠還息海濤  
陰惠日隆天眷異  
蓬萊東去近金鰲

呂朝散挽詩二首 宗傑

殊重平生那曼容  
退身能勇自為雄  
盛衰付與枕中夢  
福祿猶蟻塞上翁  
松菊漸荒三徑合  
鶴猿悞怨故山空  
蒼苔滿地塵封席  
惟有蕭蕭蕙帳風  
金馬玉堂高步宜  
中年遂與水雲期  
太冲早擅三都賦  
叔度難量萬頃波  
夜壑藏舟今孰在  
白駒過隙事堪悲  
南園從此無行跡  
老檜高松如未知

送黃集虛赴任知州 并序

故汝州刺史黃公辛  
余先君子之友也  
惡衆人之曲邪  
而以正直自立  
非士氣之偷懦  
而以忠義自任  
慨然與古人為徒  
而耻浮沉俯仰  
狗媚世習  
雖輾轉窮年  
動輒得咎  
而居貧守道愈困

愈堅君子避之始三子皆布衣公將致一歲之中皆登仕籍君子以為為善之效果不終窮乃在其子孫吾友集虛公之仲子也志義閎爽其文行有公之遺風今將之官桐廬故作是詩送之以寓意焉

桐廬古郡溯江南山色溪光藻鏡中後夜相思千里月高懷為寄一帆風欲紆龜鈕黃金印且學羊裘老釣翁忠義傳家君勉勉清名不必問窮通

楊元忠和葉秘校臘茶詩相率偕賦

風駕已馳供御品霜郊未卷喊山旂七閩地產猶為寶兩府官高故不遺須藉水簾泉勝乳也容雙井白過磁

江南雙井用御陽白薄蓋點鮮為上東堂退食公宮晚金鼎新烹欲心脾

宋英寶宣德自杞至邑將復東還見遺途中詩次韻和之以見惜別

思君仍歲此相逢後來夢魂無復東白紵淚痕何處恨故園花信幾番風歸來可喜似新燕惜別預愁如去鴻老矣奈何春半老悠悠萬事付盃中

又過陳叔易隱居相拉同遊超化寺詩

文範今亡見嗣卿潁川應聚異時新清風特為吾曹至畏景寧憂日御停踏雪曾穿東郭履移文今忤北山靈烹茶且酌南溪水第欠金山第二濡

再領玉局昔東坡在翰林作詩送戴蒙有玉局他

年第幾人之句後自嶺外歸遂領玉局予復官亦得之坡今亡矣悵然有懷

東坡因地夙相親玉局終為繼戴人祿任豈知承未軌  
恩光又許襲前程青繩附驥元非援白玉無瑕晚更真  
泉下有靈應首肯不隨兄劣易淄磷

次韻東坡還自嶺南

憑陵歲月固難堪食藥多來味却甘時雨纔聞徧中外  
卧龍相繼起東南天邊鶴駕瞻仙袂雲裏詩牋帶海風  
重見門生應不識雪髯霜鬢兩毵毵

谷隱寺書事詩

雲如戲我舒還卷雨似欺人去復來學道忘憂從老至

持盃得意使顏開驪駒喜飽嘶猶戀獬犬誇獐吠欲催

三日山中果何有賦詩滿得錦囊迴

某與鮮于緝元勛共約同習制科

趙括癡兒漫喜兵他年自料困長平將軍各有萬人敵  
下士難先二子鳴盧駱楊王何足算江黃六蓼豈勞征  
英雄少貶雖慙愧且徇區區月旦評

謁中嶽祠

嶽鎮中天司下土名山宮殿鎖雲扃固知正真作威福  
豈徇往來惟醉醒封禪今無秦漢侈降生誰是甫申靈  
何當弭節朝雙闕一曲鈞天夢帝庭

諸葛菜并序

蜀諸葛亮每行兵處必種此菜以志之邑中元  
開州家有此種僕求之以作羹甚美作詩求之  
武侯戰地記他年戰後猶當似率然會向渭原驚仲達  
尚應江磧感桓玄背山左澤甘如彼傍砌繞籬今可憐  
莫問興亡進羹茹書生贏得腹便便

將至嵩山遠觀瀑布

晚晴紫翠溢平川三十六峯凝霽烟匹練依稀分秀嶺  
玉虹搖曳舞危巔寒光定是連明漢清氣都疑貫九淵  
可笑夜來風吹後亂溝斜澗亦涓涓

和人游嵩韻

嵩嵩峻極壓三川周視方輿見廣員絕頂固知天下小

泰山為占海隅偏白雲散盡千林月急雨收回萬壑烟  
莫笑層巒高似岸舉頭一握是玄天

友人董耘饋長沙貓筍薦以享太史公太史公輒  
作詩為賦因筍寓意且以為贈年薦即和之亦以

寓自興之意且述前相知之情焉案此詩從屬鷄  
宋詩紀事補載

節藏泥滓氣凌空薦俎寧知肉味重未許韋編充簡策  
已勝絲黍誑蛟龍短萌任逐霜刀重美幹須煩雪壤封  
他日要令高士愛不應常共宰夫供

遊寶應寺

案此詩從屬鷄  
宋詩紀事補載

雨後秋風入翠微  
我來仍值晚涼時  
山遮日脚斜陽早  
雲礙鐘山出谷遲  
故國空餘烟冉冉  
舊宮何在黍離離

興亡滿眼無人語獨倚闌干默自知

賀小蘇先生

柱史承恩正紫薇玉皇優詔碧雲詞欲知伯仲文章賦  
對掌絲綸內外司雨露偏濃常棣萼烟霞常駐鳳凰池  
共扶吾道邪歸正同振斯文盛不衰白首並逢千載運  
登庸皆是十年遲靖共介福由神聽告爾多方代帝咨  
臨仕初逢賢者貴德名當問國人宜夷齊抗世清河早  
元凱登庸事可期貧賤久思楊得意龍光今喜鄭當時  
應憐下客塵埃甚慚愧雷門獻此詩

崔先生所守甚高其為人表裏澹泊然其文炳如  
有自然之美可喜也因還其詩卷題其末

別久相思今見君近詩盈軸語彌新雄妍不用近時律  
溫厚初還上世淳少與多仇身踽踽樂天知命志申申  
才高所寓皆高趣氣古斯能似古人句有萬鍾辭祿意  
衣無一點污人塵中山可鄙魏公子谷口全如鄭子真  
珍重遺音清廟瑟蕭條寡和郢中春誰同杜老知無敵  
會有君山謂絕倫白首定交雖自愧夜光投我豈無因  
欲知慰此無賴萬斛愁懷為一伸

五六七言絕

二士石榻在中院之北巨石如榻有自然石枕可  
卧二士和大受韻

憶昔登封日山蹊困六飛我來猶舍杖共坐拂雲衣

茶蘼洞

無華真國色有韻自天香臨風難自持為舞白霓裳

春色日即事九首

藹藹花絮亂紛紛蜂蝶多今年春復爾不飲柰愁何  
新綠陰將就殘紅在亦稀雨中千點絮未伴落花飛  
怒風吹老屋急雨鬧空庭莫歎林花盡懸如隴麥青  
毛桃猶帶蕊青杏已團枝老不禁春惱應知老易欺  
但喜朝朝醉那知夜夜風老人貪睡美春夢五更中  
化國有餘暇豐年多醉人典衣謀一飲對酒却慚春  
悵望白銅鞮醉聽金縷衣花間愁落日老更惜春歸  
嬌馬寧馨郎擅車薄媚娘蕭蕭兩蓬鬢愁入少年場

逃閒閉關坐忽有賣花聲老大自多感依然各洛情

雪

紙窗明眈眈雲日暗暎暎半夜寒天被清晨雪擁門

晚晴

微陽掛木杪孤鳥下雲浣廣墟遺稻梁鶴鶴伴鳧鷹  
陰壑留殘雪林虹帶晚霞孤烟障漁市不見兩三家

臨穎縣

日永行人漸困路長飢馬頻嘶驚起一雙白鶴背人飛  
向前溪

楊花詞三首

特地飛來有意等閒却去無情若比邇來時態黯然無

語銷魂

苦限紅梅結子生憎榆莢悠悠解送十分春色能添萬  
斛新愁

夜坐

且喜屋無穿隙雪未愁漏盡滿一霜紙緯布被從牢落  
賴有希牙齒頰香

全似秋空白雲不應日墮紅塵樓上何人遠望黯然無

態猶輕

補楊花詞

道中即事呈岑使君吏部次和德麟韻三首

日射西山爛爛光低雲遮岸水風涼從來鞍馬倦行役  
笑語不知歧路長

稻塍粟壠綠相連野老欣逢大有年人意物情俱自適

溶溶佳氣滿洼天

白叟黃童話使君買牛買犢諭邦人今年菽粟倉箱滿

仁政常為七縣春

春日偶題寄友人

低雲不斷風仍急細雨無聲晚更稠千里思君常在眼  
黃昏天意自春愁

呂頤野飲醉中寄五絕句次其韻

醉鄉天地一何寬不問金壺與玉山豔得陶陶太古意  
醒來應亦惡人間

酒在杯中惟恐盡事來眼底只嫌多一壺醉倒春風裡

二十一

東武李氏研錄

萬斛窮愁奈我何  
醉後詩成筆似椽客來傾酒酒如泉  
憐君常得酒中趣愧我經春只慘然  
手持金盞斝斜暉日送歸鴻萬里飛  
還似習家池上日醉中倒載接羅歸  
醉倒南山卧白雲滿天詩思不勝春  
黃雞白酒真堪樂誰道蓬蒿有此人

題孔氏東園三首

何處移來薜蘿花琢成玉葉靜無瑕  
天香不合人間有只是祇園居士家  
桐已參天栢已蒼昔年曾見似人長  
樹猶如此人休怪

賓主相逢鬢各霜

濃綠陰中黃栗留醉鄉遲日厭鳴鳩  
青春去後百花歌賴有枝頭安石榴

題唐洲東寺訪友人不值詩

三年漂泊老荊州重過淮安舊驛樓  
地上謫仙天上去故來蕭寺想風流  
眼前風景似襄陽松柏參天竹滿崗  
題鵝一聲春欲去兩催新居漸嬌黃

羨波

晴山如黛水如藍波淨天澄翠滿潭  
身在玉壺圖畫裏心隨飛鳥過終南



無題

羨君走馬踏千山却笑吟詩不肯聞  
寫得清風入嘉句盡携爽氣出雲間  
吟袖衝雲滿筆端馬蹄霜跡破朝寒  
據鞍何必須橫槊自有新詩似建安

觀音亭

錢塘西湖三百詩芳草畫橋烟靄中  
寶陀大士本無相一亭聊慰伏蛇功

綠鴨亭

澄波滄淪鴨頭綠秋水清於春水明  
芙蓉已逐秋光盡藻帶暗藏春意生

竹亭詩

繞岡修竹小亭深風籟雲梢照碧潯  
安得茂林帶左右祇應蕭爽似山陰

送元勛不伐侍親之官泉南八首

卷中識盡古來人筆下文章日日新  
萬里從親海邊縣要令南國見麒麟

君房言語妙知名元凱春秋癖已成  
作者風流公莫讓要令江海聽文鳴

看罷吳山看越山一帆千里玩風瀾  
令人頗憶羊裘老為釣桐廬七里灘

解知身世兩鴻毛肯羨一鉤連  
六鰲有口惟宜醉醇酒

時時痛飲讀離騷

梅雨晴時荔子丹絳囊青幄共檀藥按圖讀譜嘗珍品

大勝關西首當盤

泉南南浦是南溟瘴霧熏人不用醒想對文書搔首罷

刺桐花下學蘭亭

甌閩接壤氣多同只恐泉南有颶風掣虹見時定翻海

禦寒裘褐要重重

粵藤玉板澤於脂歛髮偷糜理勝犀歸日錦囊詩幾許

七閩當有數千題

送蘇伯達之官西安七首

好去西安蘇縣丞十年求友近嚴陵江山如彼君如此

正似玉壺寒露水

湖山主人玉堂客爾來華髮故應多安石雖云江海士

元元蒼生將奈何

苦憶君家兩惠連樓居應作水中仙靜看河畔青青草

應有池塘春夢篇

問訊東海秦鈞客

秦觀從先生行

爾來聞已霸風騷緡明餌香

我知愧愧爾一鈞連六鰲

寄語松陵與太湖烟波風月爾何如故時景物應如昔

復有當年張翰無

橫江一葦聽潮來江月飛霜落酒盃寄語錢塘江上月

可憐寂寞照潮迴

千里隋堤榆柳風輕花薄美正冥濛離情解逐仙舟去  
欲過三江震澤東

和陳恬思其叔子思有書齋在山中二首

古寺惜惜映夕岑谷風淒勁觸霜林曩時蕙帳知何處  
不見山人來苦吟

嗟我衰遲行老矣與君生死尚情深屈平賈誼何須舊  
敬弔先生淚滿襟

從德麟自中盧游靈溪記事

各執梅枝不執鞭涉溪穿竹過林烟景純夢裏經行處  
直到青溪古洞天

青溪翠壁瀉琮瑋洞府猶傳鬼谷名幸有六經堪送老

不思唇舌慕從橫

裂崖泉射便成溪溪畔虛巖匹練垂玉濺珠跳千仞底  
陰陰衆木媚清池

次韻秦少章蠟梅

底處嬌黃蠟樣梅幽香解向晚寒開故人未寄嶺頭信  
先報江南春意來

德麟以書相招云已與潘仲寶在中盧可自鄮來

同游靈溪石門雙池等勝處某作六詩率張會川  
作

冰溪雪嶺赴詩盟我媿難先二子鳴莫憚登臨助餘勇  
欲令萬戰遇奇兵

靈溪閩洞鍊華胥地脉旁通分野殊草憚登臨探奇險  
恐君他日亦藏書

千仞雲崖聳石門古傳此地聖凡分我曹自愧羣峰謂  
未必山靈解勒文

地上雲居有梵天碧池靈脈瀉雙泉不應勝地能埋沒  
政欲因居住佳句傳

雲外泉聲度碧林瀏絜累帶作清深吾纓已分令塵染  
欲借寒光去洗心

異時空惚此時間甘在塵中可厚顏天為好山生勝士  
莫因便懶負雲山

題峻極下院列岫亭詩

早訝年來狂士來每來亭上獨徘徊山應又喜添知己  
去後山容似死灰

山色滿亭亭倚空與君俱在畫圖中解道龍騰青壁斷  
令人却憶漫浪翁

聖俞詩云絕壁龍騰青壁斷極天神降白雲空

筍箨筆詩

琅玕天矯排霄去敗箨平堦聊貯儲付與管城湯沐地  
何須毛穎號中書

雪中汎漢江呈德麟

漢江莽莽雪浮浮遠想山陰汎剡遊高興共成何更盡  
子猷安道喜同舟

將至鄮城和德麟韻

綠勝章臺楊柳街青羅斗帳淨無埃五株何用詩頻說  
安得韓公到此來

曉至長湖戲贈德麟

桐實離離秋帶長玉鞭驕馬度垂楊黃節野店人爭看  
籬上紅梅粉額粧

和李端叔大夫從參寥子游西湖十絕

幾處鞦韆愁日暮一聲鷓鴣喚春歸紅稀綠盡尋常事  
不用長繩繫落暉  
草已芊綿柳已柔落花重疊不須愁風光流傳等閒過  
又是一年春事休  
百物爭春竟可憐清池綠淨但沈天浮萍細碎從渠長

憎見差池點苻錢

西疇新買數塍田便掃空園俟有年欲坐瓜菴吹豆葉  
風翻黃浪麥秋天

風頭皺浪開還促兩點圓紋亂更多何似無風亦無雨  
碧天千里在澄波

癡兒插地栽楊柳楊柳無根插便生我亦無根常作客  
四年漂泊大梁城

股大如腰立已憂不須登閣始三休道人尊足元無病  
莫取形骸向裏求

夢為蝴蝶恣飛飛入飛花叢處處迷不是提壺強呼起  
尚應栩栩展江西

詩翁詩思與春爭落筆風雷紙上生雪棘滿頤心尚壯  
君看巖電射人明  
池南池北亂蛙聲不問官私處處鳴昨夜一犁新雨足  
無煩科斗更滋生

釣臺

竹岡深貯一溪雲溪灣盡釣磯新魚鳥相忘自相樂使  
君元是狎鷗人樂  
山東太白謫仙人筆捲天河氣拂雲百代公卿朝西徧  
清溪石上想巖君  
興王不患無功業賊亂常憂在歲寒能緩阿瞞移鼎手  
長鋌此日愧漁竿

中春

輕挨殘花香簌簌旋剝新荀自纖纖傷春煮筍買春酒  
短褐破碎人家嫌

春日風雨晚題

低雲不斷風仍急細雨無聲晚更稠千里懷人常在眼  
黃昏天意自春愁

王子立寄三絕句云常詣夏暈吉卜云宜見君子  
子立作詩薦次韻

久依鳳翼與龍鱗萬里青雲可致身聖主求賢如不及  
夜光豈復怒無因

富貴自知當自信耆鮐福併因脩長陰陽可測非天理

男子人知亦易量

三首新詩慰病軀萬金何必是家書隔年已有游嵩約  
玉趾何時過敝廬

寒食案此詩從宋詩紀事補載

千株密炬出嚴闈走馬天街賜近臣我亦茅檐自鑽燧  
煨鍼燒艾檢銅人

飲襄陽沈氏家醉題侍兒小瑩犀帶案此詩從宋詩紀事補載

旋剪香羅列地垂嬌紅嫩綠寫珠璣花前欲作重重結  
繫定春光不放歸

興安道中雪晴見羣山偶成

關山千里湧銀濤晚日烘雲欲動搖滕六自知遷客近

前驅一洗瘴烟消

雪晴

山凝秀色螺成髻溪走寒光珠在盤更欲呈姿作清巧  
暫粧梅柳雪中看

飛閣

飛閣凌波浮渺茫碧山白雲坐相忘好風歷楫泛我袂  
興來取纓濯滄浪

未曉出雙池小雪作

忽忽暮食過重邱炬影通林見遠流雲物瀾翻烟幕歷  
細風吹散上征裘

瓦廟

柱側簷欹瓦欲飄斷垣苔滋樹蕭蕭滿庭荒草無香火  
惟有禽聲伴寂寥

詩餘

虞美人

玉闌干外清江浦渺渺天涯雨風如扇雨如簾時見岸  
花汀草漲痕添青林枕上關山路卧想乘鸞處碧燕  
千里思悠悠惟有霎時涼夢到南州

菩薩蠻

雙松庵月  
夜賞梅

城陰猶有松間雪松間暗淡城頭月月下幾枝梅為誰  
今夜開罇前簪素髮自擁繁枝折疑是在瑤臺寶燈  
攜手來

清平樂

送別

落梅嗚咽暗淡城頭月吹滿江天驚夢蝶喚起畫樓傷  
別簾風輕觸銀鈎梧桐玉露新秋底事瑣窗深夜素  
蛾常伴人愁